

# كتاب انجيل سورت روم

باليق درفد بهاس اصل  
كا بهاس ملايولغة فتاني

พันธสัญญาใหม่ หนังสือโรม

# روم

سورت کیریمن هق توهن بري فولوس  
تولیس کفد فواق المسیح دکوت روم

## باب 1

فولوس جاني سئورغ هق باوا تيته عیسی المسیح

- 1 کفد ادیق برادیق کو سما، اورغ هق توهن کاسیه دکوت روم. اکو ني فولوس، هق کرج کا عیسی المسیح، کیریم سورت کفد مو. توهن لتق اکو جاني سئورغ دالم فواق هق باوا تيته
- 2 بي. کرج اکو ني، کنا مېمفي خبر بائیک هق توهن جنجي دغن نبي ۲ بولو دالم کتاب یغ سوچي.
- 3 خبر بائیک ني چارا حال انق توهن یغ ساتو، یائیت عیسی المسیح، ربّي کیت. نق رويت حال عیسی جاني ماء نسي، ري کتورونن راج داءور.
- 4 نق رويت حال عیسی جاري توهن یغ سوچي، توهن، دغن کواس فنوه هق ري، بري پات کات عیسی تو جاني انق ري، کران لفس فد عیسی ماتي، توهن بري دي هیدوف کلیق سمولا.
- 5 سابیت ربّي کیت ساء نیله، توهن تورون رحمة اتس اکو، فولوس، بري جاني سئورغ هق باوا تيته دي. کرج اکو ني، کنا فیمفین اورغ سما بفسا، بري فرچاي فس طاعة کا توهن، دغن توجوان نق بري نام عیسی تو دافت مليا.
- 6 فواق مو دکوت روم فون، ماسوق جوگ دالم فواق هق توهن

7 فڱڱيل جاني ميليقي المسيح. سبب توله، اكو ڪيريم سورت ني  
 ڪا فواق مو، هق توهن بري جادي ميليقي دي.  
 اكو مينٽاءِ توهن باف ڪيت دغن رڻي عيسيٰ المسيح، تورون  
 رحمة اتس فواق مو، دغن سلامت سجهترا!

### فولوس اوچف تريما ڪاسيه ڪا توهن

- 8 مولا ۲ سڪالي، اكو اوچف تريما ڪاسيه ڪا توهن، دغن نام  
 عيسيٰ المسيح، سبب خبر ڪات فواق مو سموا براهيم قواة  
 ڪا توهن، مشهور ڪي سرات تمفت.
- 9 اكو براني فڱڱيل توهن جاني سقسي، ڪات سوڱوڱه اكو دوق  
 مينٽاءِ دعا ايغت ڪا فواق مو سعمور. انتوق توهن ني له اكو  
 ڪرج دغن سوڱوڱه ۲ هاتي، نق ميمفي خبر بائڪ چارا حال انق  
 10 دي. لاني اكو مينٽاءِ توهن بري اكو بوليه ماري زياره فواق مو.  
 11 سبب لام ماري ده، اكو دوق براس چيتا ۲ نق ماري برتمو دغن  
 مو، نق سره ڪافواق مو فرڪارا ۲ هق توهن تورون ڪا اكو، نق  
 بري قواة ايمان مو.
- 12 بالس توله، ايمان ڪو نق تولوغ تمبه هاتي مو بري فرچاي قواة  
 فس، ايمان مو فون نق تولوغ تمبه هاتي ڪو، بري فرچاي قواة  
 13 جوڳ. اكو نق بري اديق براديق تاهوڪات، اكو دوق برحاجة  
 بايق ڪالي ده، نق ماري زياره فواق مو، تافي ار چمفيغ  
 سعمور، تاءِ ليه ماري. ڪهندي هاتي ڪو نق بري ڪهور منمبه  
 اورغ فرچاي دڪوت روم مو، نق بري سروف دغن بغسا لائين ۲  
 رتمفت هق اكو بياس ڪي زياره لفس ۲ ده.
- 14 اكو مستي ڪنا ڪي رويت خبر ني ڪا سموا بغسا، سروف اكو  
 لڪت اوتغ ڪا سموا اورغ. اكو ڪنا ڪي رويت ڪا اورغ هيلير دغن  
 اورغ رارت، ڪا اورغ ار علمو دغن اورغ تاءِ ار علمو، بري تاهو  
 سروف سموا.

15 سبب توله، هاتيکو روق سيمفن سيف ده نق ماري رويت خبر باءيك کا فواق مو دکوت روم فول .

### خبر باءيك حال عيسى ار کواس

16 اگو بوليه جامين کات، خبر باءيك ني بوليه هارف سوغکوه . خبر باءيك ني، ياءيت کواس درفد توهن، هق بوليه بري سمو اورغ هق فرچاي دافت سلامت، سمفي کا اورغ ييهوي دولو، فس سمفي کا بغسا لاءين ۲ فول .

17 خبر باءيك ني بري تاهو چرف کات، توهن سيمفن سيف ده، جالن هق مائسي بوليه جادي تاءساله دنداغن توهن. جالن ني، مائسي بوليه ماسوق، بوليه توروت، دغن فرچاي کا عيسى ساج، بوکن دغن سبب لاءين، دق ! ار ايات دالم کتاب کات بالس ني جوگ، ياءيت :

اورغ فرچاي، توهن کات ري تاءساله ده، فس  
توهن نق بري کا ري هيديوف چارا بارو.

### توهن مرک کا مائسي هق سوک بوات جاهت

18 ار اورغ مغهينا کا توهن، ار اورغ سوک بوات جاهت سمو فرکارا، هق بوات بري اورغ لاءين تاءليه تريما فرکارا هق سبئر درفد توهن. سبب توله، توهن سوده بري تاهو چرف کات، ري مرک نق جاتوه حکوم .

19 توهن مرک، کران ري سوده بري تاهو کا مائسي خال ري دغن تروس ترغ، تافي مائسي تاءسير تريما .

20 جق توهن جاديکن دنيا ماري، مائسي بوليه فرهاتي کليه صيفه ۲ توهن، ري هق مات کيت تاءليه نمفق. درفد سمو فرکارا هق ري بري جايي دالم دنيا تو، کيت بوليه فرهاتي

کلیه کات، دیاله توهن، فس کواس یی تاء ار سور. نق کات تاء تاهو حال یی، تاء لیه.

21 ولو فون مائنسی تاهو حال توهن بالس تو، تافی یی تاء سیر حرمة کات توهن. فس یی تاء سیر تریمه کاسیه لغسوغ کا توهن. فیکیران یی سست، هاتی یی جایی گلف ده.

22 مائنسی کات دیری یی چریدیق، تافی سسوغکوهن، یی بودوه.

23 یی تاء سمبه کا توهن یغ ککل، یی تیغل کئی بوات برهالا ۲، روف ۲ مائنسی، روف بوروغ، روف بناتغ، روف ناگ، نق سمبه کنقی توهن.

24 سبب مائنسی بودوه ستارا تو، توهن فون لفس یی کئی، بوات ایکوت نفسو یی، هق چافوغ، هق چمر، سهیغ ک بایق اورغ خیانه توبوه یی، بوات فرکارا هق کجی ساعت سام سنڊیری یی تیغل توهن هق سبیر، کئی توروت هق فلسو. یی سمبه بارغ ۲ لائین، نق بوات کنقی توهن، توهن هق بری جایی بارغ ۲ هق یی سمبه تو، توهنله هق فاتوت کیت فوجی، بوات سلام ۲، امین!

26 سبب مائنسی سوک بوات جاهت کیتو لالو، توهن لفس یی کئی، بوات ایکوت هوا نفسو یی. فس نفسو جنتن بتینا بوات ساله عاده، هیغ سمفی اورغ بتینا فون تیغل اورغ جنتن برکن سام اورغ بتینا.

27 اورغ جنتن فون سروف تو جوگ. یی تاء برکن اورغ بتینا، کئی کیلا سام جنتن یی. دغن سبب یی بوات فرکارا ۲ یغ هینا تو سام سنڊیری، توبوه یی فون فونه. یی دافت بالسن هق سوغ فاتوت دغن کجهاتن یی.

28 مائنسی تاء سیر تریمه علمو هق سبیر حال توهن. سبب توله توهن فون لفس بری هاتی یی گلف، فیکیران یی سست، بوات سمو فرکارا هق مائنسی تاء فاتوت بوات.

### چيتا ۲ جاهت ار فنوه دالم هاتي مائسي

- 29 مائسي ني سما، چيتا ۲ جاهت ار فنوه دالم هاتي. بارغ يي سنديري ار ده، تافي يي طمع نق هق اورغ لائين. يي سوک بوات هودوه کا اورغ لائين. نفسو برئځي، سوک بونوه اورغ، برباله سام سنديري، فندي منيفو، برکنن تيغوق اورغ لائين جاتوه سوسه، سماو نفسو ني دوق فنوه دالم هاتي يي. يي سوک کيچيځ مځوفت دغن چرچ کا اورغ.
- 30 يي بنچي کا توهن، يي سومبوغ کا مائسي، هاتي يي تکبور. يي سوک بسرکا ډيري يي. يي فيسه چاري جالن نق بوات جاهت سماچم، يي درهاک کا ايبو باف.
- 31 يي هيډوف تاء تنټو کالو. يي سوک موځکير جنجي دغن اورغ، هاتي يي تاء ار کسياغ بلس کا اورغ لغسوغ.
- 32 توهن سوده لتق حکوم کات، اورغ هق توروت سماو فرکارا ني، فاتوت يي کنا حکوم نراک. مائسي تاهوده حکوم ني، تافي يي بوات جوگ لبيه ۲ لاځي، يي برکنن تيغوق اورغ لائين بوات جاهت سروف يي.

### توهن نق جاتوه حکوم

#### باب 2

- 1 هي ساءين کو! اکو فولوس نق تان سيکيت. باءاف، مو سوک حکوم ساله کا اورغ لائين؟ بيلا مو بوات ساله سروف يي، مو کنا حکوم ډيري مو سروف يي جوگ! نق کات تاء ساله تاءليه.
- 2 بيلا توهن جاتوه حکوم کات، اورغ بوات جاهت تو، ساله، سماو اورغ فاکت ستوجو کات، موليق ده، حکوم بالس تو!
- 3 تافي ايغتله، ساءين کو! بيلا مو حکوم ساله اورغ هق بوات فرکارا ۲ تو، فس مړ کي بوات سروف يي، مو نق لاري بري لفس فد حکوم تاءليه جوگ!

- 4 بڱڪالي سائين بوات تاءِ برت ڪا توهن، سبب توهن ڪسياڻ بلس  
صبر، تاءِ جاتوه حڪوم اٿس مو بلس تو؟ تاءِ فهم ڪه، ڪات،  
توهن ڪسياڻ بلس سمفي ستارا تو، سابيت دي برڪهندي نق  
بري مو فلوڻاڻ باليق هاتي، توبه؟
- 5 تافي مو هاتي ڪرس، تاءِ سير توبه! بيلا هاتي مو ڪهور ڪرس،  
ڪهور برت لاڳي حڪوم اٿس مو فد هاري قيامه، ياءِ يت هاري  
توهن نق حڪوم اٿس ماءِ نسي سما، دغن عاديلا .
- 6 فد هاري توله، ڪنف ۲ اورڻ نق بولي بهالسن ايڪوت فرڪارا ۲ هق  
7 دي بوات ده. ستغه اورڻ ڪاچڻ بوات بائڪ سممور. اورڻ ني  
چاري هق مليا، هق سبئر، هق ڪڪل. ڪفد اورڻ نيلاه توهن  
نق بري هيڊوف چارا بارو هق دي سممور ۲ .
- 8 فس ار ستغه اورڻ دوق ايغت نق بري سنڱ ڪا ڊيري دي ساج.  
دي تاءِ سير توروت هق سبئر. دي توروت هق جاهت سمات .
- 9 تنتو توهن نق مرڪ تروق ڪا اورڻ بالسن ني . توهن نق تورون  
سيقسا سڱسارا اٿس ڪنف ۲ اورڻ هق بوات جاهت بالسن تو،  
مولا ۲ تورون اٿس اورڻ يهوي دولو، فس سمفي ڪا بڱسا لائين ۲  
10 فول . تافي اورڻ هق بوات بائڪ، ڪنف ۲ اورڻ، توهن نق بري  
مليا ڪا دي، نق فوجي ڪا دي، نق بري دي سلامت، مولا ۲  
ڪفد اورڻ يهوي، فس سمفي ڪا بڱسا لائين ۲ فول .
- 11 ڪران توهن عاديلا، دي نق تيغوق ماءِ نسي سروف سما .
- 12 اورڻ هق دوق لوار فد اوڳام يهوي، توهن نق جاتوه حڪوم  
اٿس دي، ڪران دي لغر حڪوم دي، بوڪن ڪران دي بوات ساله  
حڪوم ۲ دالم تورات. تافي اورڻ يهوي فول، توهن نق جاتوه  
حڪوم اٿس دي، ڪران دي بوات ساله دغن تاءِ توروت حڪوم ۲  
دالم تورات.
- 13 سابيت، بوڪن ڪران اورڻ بولي بهالسن دغر حڪوم ۲ تورات، هق توهن  
ڪات تاءِ ساله، دق! تافي اورڻ هق بولي بوات توروت سما

حکوم ۲ تو، هق توهن کات تاء ساله.

- 14 اورغ هق دوق لوار فد اوگام يهوي، ولو ري تاء تاهو کتاب تورات سکالي فون، کالو ري بوات فرکارا ۲ بتول، هق ار سوروه دالم کتاب تو، سابيت ري تاهو هق باء يک، معنائ هق ري تاهو دالم هاتي توله، توهن بري جاري سروف حکوم انتوق ري. 15 فريواتن اورغ تو، جاي تنداکات، ري ار دالم هاتي ري هق تيمبغ ري، سروف دغن حکوم ۲ دالم کتاب تورات. تکه ۲، هاتي ري کات هق ري بوات تو ساله، تکه ۲ کات، هق ري بوات تو، بتول. ني فون جاي تنداکات سوغکوه کات، ري ار حکوم دالم هاتي ري.

- 16 بيلا سمفي هاري قيامه، توهن نق بري عيسى المسيح فريقسا سموا فيکيران دالم هاتي ماء نسي، باروله ري نق کرت سين. سموا هق اکو بارو رويت ني، ار ده دالم خبر بائیک هق توهن بري کا اکو

### اورغ يهوي کيچيق بسر، تافي ري هينا کاتوهن

- 17 هي سائين کو! اکو نق کيچيق هوبوغ سيکيت لاکي. مو کيچيق بسر کات، مو اورغ يهوي هق فگغ سموا حکوم ۲ توهن. مو کات، توهن فيليه بغسا مو ساج.
- 18 مو تاهو کهندق توهن هق ري سوروه مو بوات. فس، دغن مغازي سموا حکوم ۲ دالم کتاب تورات، مو تاهو فيليه، جالن مان موليق، جالن مان تاء موليق.
- 19 تنتوله مو کات، مو بوليه فيمفين اورغ هق مات هاتي بوت، مو بوليه جاي فليتا کا اورغ هق برجالن دالم گلف.
- 20 مو بوليه اجر اورغ هق تاء فندي باواء ديري، مو بوليه جاي گورو کا اورغ هق تاء ار علمو. فواق مو مغازو کات سموا علمو، سموا فرکارا هق بئر، ار رويت چوکوف سيف ده دالم کتاب تورات.



- 21 سائين ڪو! اڪو نق تان فول. باءِ اف مو اجر اورغ لائين، تافي  
 مو سنديري تاءِ بوات؟ مو کات: جاغن چوري، تافي مو کي چوري.  
 22 مو کات: جاغن برزينا، تافي مو برزينا! مو بنچي کا فواق هق  
 بوات برهالا، تافي فواق مو کي چوري بارغ هق ار دالم رومه  
 برهالا!  
 23 مو کيچيق بسرکات، بڻسا موساج بوليه تريما حکوم ۲ توهن،  
 تافي مو بوات هينا کا توهن، دغن لڱر حکوم دي تو.  
 24 ار ايات دالم کتاب، کات:

دغن سبب فريواتن اورغ يهوي نيله، بڻسا لائين ۲  
 سموا تيغوق هينا کا توهن.

برسونه دغن تورت حکوم ۲ توهن، مان هق مستحق؟

- 25 کالو مو بوات ايکوت حکوم ۲ توهن دالم کتاب سوڱوه،  
 روکون مو برسونه تو ار فائده. تافي کالو مو لڱر حکوم توهن  
 تو، روکون مو برسونه فون، سيا ۲ ساج.  
 26 کران اورغ بڻسا لائين ۲ هق تاءِ تريما روکون برسونه، کالو دي  
 بوات هق بتول، ايکوت حکوم توهن، توهن تريما دي سروف  
 اورغ برسونه ده، بوکن؟  
 27 سسوڱوهش، فواق ني هق تاءِ برسونه تافي دي تورت حکوم ۲  
 توهن، دي بري پات کات، اورغ يهوي ساله سوڱوه، کران دي  
 برسونه ده، دي تريما حکوم ۲ توهن ده، تافي دي لڱر حکوم ۲  
 تو.  
 28 اورغ يهوي سجاتي، اورغ بالس مان؟ اورغ هق بڻسا دي يهوي  
 هق برسونه که؟ دق! هق سجاتي بوکن فرکارا هق لوار، دق!  
 29 تندا اورغ يهوي سجاتي بالس ني. دي تريما سوروهن توهن بري  
 ماسوق هاتي. بوکن دي تريما تندا برسونه دتوبوه ساج، دق.

تندا دالم هاتي ساءني كنا جادي دغن كواس روح توهن .  
 تاءليه جاي دغن سبب لاءين . اورغ ماچم نيلاه ، ري تريما  
 فوجين درفد توهن ، تاء كيرا فوجين ماء نسي .

### اف فائده جادي اورغ اوگام يهوري ؟

### باب 3

1. ميسل ، ار اورغ تاش كات : اف فائده جادي اورغ بغسا  
 يهوري ؟ اف فائده تريما روكون برسونه ؟
2. اكو جواب كات : تنتو فائده ار بايق . ساتو ، توهن لتق بغسا  
 يهوري ني بري ميمفي خبر توهن كا سموا مائسي .
3. فس ميسل ، اورغ تاش فول : كالو ار ستغه اورغ يهوري هق تاء  
 سير توروت كهندق توهن ، انتوق بغسا ري ، توهن نق فوتوغ  
 كا دق ، فرجنجين ري دغن فواق يهوري ؟ تنتو تاء ليه !
4. فركتائن توهن تتف سمات . ولو فون مائسي سموا بوليه بوهوڭ ،  
 تافي توهن تاء بوهوڭ . سروف ار ايات دالم كتاب كات :

يا توهنكو! سموا اورغ مڭاكو كات ، بئر سوڭگوه  
 فركتائن مو . تاء ار سياف بوليه كات توهن ساله !

5. فس ، ميسل ار اورغ نق بحس لاكي ، كات : مائسي كيت بياس  
 بوات ساله سعمور . كالو دغن كسلاهن كيت ، اورغ لاءين بوليه  
 نمفق كهوڭ چرف لاكي ، كات ، توهن بتول ، فس سابيت تو ،  
 اورغ فاكت فوجي كا توهن ، موليق كا دق ، توهن نق جاتوه  
 حكوم كا كيت ؟ نمفق تاء موليق ! اينيله فركتائن اورغ بحس ساج .
6. تافي اكو جواب : تاء ليه كات بالس تو ! بيلا كيت بوات ساله ،  
 توهن مستي كنا عاديل ، مستي كنا جاتوه حكوم . كالو ري تاء عاديل  
 ري تاء ليه جاي حاكيم اتس سموا مائسي ، بوكن ؟
7. فس ميسل اورغ بحس تاش فول : ميسل ، كيت بوهوڭ ، فس دغن  
 سبب كيت بوهوڭ تو ، اورغ لاءين نمفق كات ، توهن تاء بوهوڭ .

فس، كهوڙ فوجي ڪا توهن لبيه فد ڏولو. ڪالو ڪيتو، سبب اف توهن نق جاتوه حڪوم ڪات ڪيت اورغ بردوسا؟ اورغ بحس تاش. تافي اڪو فولوس نق جواب: ڪالو مو فهم بالس تو، سروف ڪات موليقله ڪيت بوات جاهت، ڪران نق بري موليقله ڪو دافن! فيڪيران بالس ني ساله سمات. تافي اد اورغ ڪات، اڪو فولوس دوق مڃاجر اورغ بالس تو. دق سڪالي! فواق هق چرچ ڪا اڪو بالس تو، نق ڪنا حڪوم برت هق سوغ فاتوت.

8

سموا مائسي دوق دالم فرينته هوا نفسو دي

ڪالو ڪيتو، ميسل اد اورغ تاش لاکي: ڪيت اورغ يهودي، اد ڪا دق فائده ڪا بڻسا ڪيت سنديري، لبيه فد بڻسا لائين؟ اڪو فولوس جواب: تاء اد! اڪو سوده تنجوق دغن پات، ڪات، سموا مائسي دوق باوه فرينته نفسو جاهت هق دي. اورغ يهودي دغن بڻسا لائين ۲ فون سروف. اد ايات دالم ڪتاب ڪات:

9

10

اورغ هاتي بتول، تاء اد سئورغ هابوق. تاء اد اورغ بوليه ارتي حال توهن. تاء اد سياف دي نق چاري توهن. سموا اورغ فاليع ڪي ڪو جالن لائين ده، جاري فونه هابيس، توهن ڪات. اورغ بوات بائڪ تاء اد. فرڪتائن هق توبيت دمولوت دي، اد بهيا، سروف لياغ هق اورغ تاء ڪمبوس لاکي. ليده دي سبوت فرڪارا بوهوڙ سعمور. فرڪتائن دي بيسا نق بوات خيانه ڪا اورغ.

11

12

13

دي سوڪ ماڪي اورغ بري ساڪيت هاتي.

14

ڪالو اد فلواغ فون، دي بونوه اورغ سلالو.

15

مان ۲ جالن دي لالو، دي بوات خيانه ڪا اورغ، بري اورغ

16

سوسه هاتي ساشت .

نق دوق سنغ دغن اورغ تاءليه .

كا توهن فون ني تاء تاكوت لغسوغ .

17

18

ايات ۲ هق كيت باچ دالم كتاب سائي، سبوت حال اورغ بغسا  
يهوي، هق تريما ده حكوم ۲ توهن دالم كتاب . جاي فواق  
نيله هق كنا تورت سموا فركارا هق توهن سوروه دالم كتاب  
ني . توجوان توهن ، دي نق بري سموا اورغ كاتوف مولوت ،  
دوق سيف ۲، تاءليه كات تاءسالة ، سبب سموا اورغ ار سالة  
بلاک . بگيتوله ، كيت بوليه تاهو كات ، سموا اورغ دنيا سالة ،  
فاتوت توهن كنا جاتوه حكوم اتس ني .

19

سسوگوهش ، مائسي كيت تاءليه تورت سموا حكوم ۲ توهن ،  
انتوق نق بري توهن كات ، كيت تاء سالة اف ۲ . تننو تاءليه .  
تافي دغن سبب حكوم ۲ تو ، مائسي كيت بوليه تاهو ستارا  
مان سالة هق كيت بوات .

20

ار جالن مائسي بوليه جاي تاءسالة دفنداغن توهن

تافي لاني توهن بري پات ده كات ، ار جالن مائسي بوليه  
جاي تاءسالة دفنداغن دي ، تاء سروف دغن جالن تورت حكوم  
حكوم دالم كتاب . كتاب سموا نبي ۲ ار سبوت حال جالن ني  
جوگ . توهن نق بري اورغ بغسا مان ۲ فون جاي تاءسالة  
دفنداغن ني ، کو جالن فرچاي ، ياءيت فرچاي دغن عيسى  
المسيح . بغسا مان ۲ فون سروف دفنداغن توهن .

21

22

كران سموا اورغ ار دوسا ، سغكغ جاءوه درفد كمليان هق توهن  
نق بري كا مائسي .

23

تافي توهن كسياغ بلس سمات ۲ . دي تورو رحمة اتس مائسي ،  
جاي هديه ، بري ار جالن بوليه كات مائسي كيت تاء سالة

24

ده. کیت بولیه لفس فد حکوم توهن اتس دوسا، دغن کران عیسی المسیح.

25 سبب توهن جاتوه حکوم اتس عیسی المسیح، بري دي قربان پاوا دي گنتي کیت. کیت هق فرچاي فرکارا ني، نق بولیه امغون سموا دوسا. بالس تو، توهن تنجوق کات دي عاديلا. ماس دولو، توهن دوق صبر، تاء جاتوه حکوم اتس مائسي کیت. 26 تافي لاني، دي تنجوق بري نمفق کات، دي توهن یغ عاديلا. سوغکوه. فس، دي بري نمفق کات، کیت هق فرچاي کا عیسی، تاء ساله ده دنداغن دي.

### جالن سا ساج، ياءيت جالن فرچاي

27 کالو کیتو، ار کا دق سبب بري کیت بسر کا ديري، کات تاء ساله تو؟ تاء ار. کران بوکن سبب کرج کیت بوات، هق توهن کات کیت تاء ساله، دق! تافي سبب کیت فرچاي ساج. سابيت تو، تاء ار سبب کیت بولیه بسر کا ديري. 28 کران ار ساتو جالن ساج، هق بولیه توهن کات مائسي تاء ساله ده دنداغن دي، ياءيت جالن فرچاي، بوکن جالن توروٲ حکوم ۲ توهن ده.

29 بغکالي ار اورغ يهودي هق سفک کات، توهن دياه توهن هق بغسا يهودي ساج. دي تاء فهم که، کات، توهن سا ساج اتس سموا مائسي، اتس سموا بغسا؟

30 فس سابيت دي سا تو، توهن ار جالن سا جوگ، هق بولیه کات مائسي تاء ساله دنداغن دي، ياءيت جالن فرچاي، بغسا يهودي کران دي فرچاي، بغسا لائين ۲ کوٲ جالن فرچاي جوگ.

31 بغکالي اورغ نق کات: تاکوت دغن جالن فرچاي ني کیت نق تولق تاء فاکي حکوم ۲ توهن. دق! بوکن بالس تو. سسوغکوهش کیت ستوجو دغن حکوم ۲ توهن، نق فکغ بري کهور قواٲ لاکي.

## باب 4

## نبي ابراهيم جاني چنتوه انتوق کيت

- 1 ماري کيت فرهاتي کليه کا نبي ابراهيم، تو نينيق اورغ
- 2 يهويي کيت. سوغکوه کا دق، توهن نمفق ابراهيم تاء ساله دغن کران ري بوات ايکوت حکوم ۲ هق توهن سوروه؟ تاء سوغکوه! کالو توهن نمفق ابراهيم تاء ساله ده، دغن کران ابراهيم بوات تورو سموا حکوم ۲ توهن تو، تنتو ابراهيم بوليه بسر کا ديري دي، بوکن؟ تافي ابراهيم تاء ار اف سکارا هق بري ري سبب بوليه بسر کا ديري دافن توهن، سروف ار ايات دالم کتاب کات:

ابراهيم فرچاي کا توهن. سبب نيله توهن کيرا  
کات ابراهيم تاء ساله ده دنداغن دي.

- 4 ميسل سئورغ ماري اوفه کيت بوات کرج. بيلا سوده کرج تو، اوفه کيت تاء ليه کيرا کات هديه. اوفه تو هق سوغ فاتوت دغن هق کيت کرج.

- 5 تافي ماء نسي دغن توهن بوکن بالس تو. توهن تاء بري ماء نسي، بوات کرج انتوق دافت بالسن. توهن سوروه کيت فرچاي، فد ري هق يڭ ار کواس بري اورغ ساله جادي بتول. بيلا کيت فرچاي بالس تو، توهن کات، کيت تاء ساله ده دنداغن دي.

- 6 نبي داءود فون سوده کات اورغ هق براونتوغ سوغکوه، ياءيت اورغ هق توهن کات تاء ساله ده، دغن کران اورغ تو تورو جالن فرچاي. بوکن دي تورو جالن بوات کرج اف ۲ فون. نبي داءود سبوت دالم کتاب کات:

براونتوغله اورغ هق توهن امفون ده کسلاهن دي، اورغ  
هق توهن هافوس هابيس دوسا ۲ دي. براونتوغله اورغ هق  
توهن تاء کيرا دوسا دي بايق مان ۲ فون!

7

8

9 اورغ هق نبي داءود کات براونتوغ ساءني، فواق مان؟ اورغ يهوي هق برسونه توساج که؟ دق! دي سيوت حال اورغ هق تاء برسونه جوگ. نبي ابراهيم هق کيت رويت ساءني، جاي چنتوه انتوق کيت جوگ. توهن کات ابراهيم تاءساله ده دغن کران ابراهيم فرچاي ساج.

10 فيکيرله سبنتر! فد ماس تو، ابراهيم برسونه ده کا دق لاکي؟ دق، دي تاء برسونه لاکي.

11 دغن کران ابراهيم تورو جالن فرچاي، توهن کات ابراهيم تاءساله ده. لفس تو فول، بارو توهن بري دي برسونه، جاي تندا کات دي تاءساله ده دغنداغن توهن. توجوان توهن، نق بري ابراهيم جاي توء نينيق کا سمو اورغ هق تورو جالن فرچاي، فس سابيت تو، دي تاءساله ده، ياءيت بغسا لاین ۲ هق تاء برسونه، سکالي دغن اورغ يهوي هق برسونه ده، 12 تافي هق تورو جالن فرچاي گاتيک، ايکوت چنتوه توء نينيق دي، نبي ابراهيم، هق فرچاي دولو لاکي فد دي برسونه تو.

### فرجنجین توهن کا ابراهيم سمفي کا کيت لاني

13 ار فساک هق توهن جنجي نق بري کا ابراهيم، سمفي کا سمو انق چوچوري، ياءيت توهن نق بري دي فرينته اتس سمو دنيا، ماس کوء دافن. توهن جنجي نق بري فساک ني، بوکن سبب ابراهيم تورو سمو حکوم ۲ دالم کتاب، تافي سبب ابراهيم فرچاي ده، فس سابيت تو، توهن کات دي تاءساله.

14 کالو مائسي بوليه تريما فساک تو کوء جالن تورو حکوم دالم کتاب، سروف کات، تاءار فائده، جالن فرچاي تو. فس، سروف توهن برجنجي مائين ۲ ساج. تافي دق! توهن نورو حکوم ۲ دالم کتاب، توجوان دي، نق بري مائسي کابر

کات توهن نق مرک دغن اورغ ساله حکوم تو. فس کالو تاء ار  
حکوم، تنتو اورغ تاء ليه لغکر حکوم تو، بوکن؟

16 سابيت نيله، توهن بري فساك هق ري جنجي تو کنا برگنتوغ

فد جالن فرچاي، نق جامين کات، فساك هق توهن بري

دغن کاسيه تو، نق بوليه کا سمو اورغ هق جادي کتورونن نبي

ابراهيم، بوکن کا ساتو بغسا هق توروٲ حکوم ۲ دالم کتاب ساج

تافي کا ماءنسي مان ۲ هق فرچاي کا توهن سروف نبي ابراهيم.

کران ري جادي تو نينيق سمو اورغ هق فرچاي.

17 ايکوت ساتو ايات دالم کتاب، توهن کات کا ابراهيم:

اكو لتق مو جاني تو نينيق ماءنسي بايق بغسا.

هق توهن جنجي تو مستي کنا جاي. کران توهن هق

ابراهيم هارف تو، ار کواس بري اورغ ماتي هيڊوف کليق.

18 ري بوليه بري فرکارا هق تاء ار، جاي ار. سوغکوه فون

ابراهيم تاء ار هرافن نق بوليه انق، تافي ري تاء فوتوس

فرچاي، کات، ري نق جاني تو نينيق بايق بغسا، ايکوت

فرجنجين توهن کا ري، کات:

مو نق دافت کتورونن بايق، سروف بينتغ دلاغيٲ.

19 فد ماس تو، ابراهيم عمور ري دکت نق سمفي سراتوس تاهون

ده. ري تاء کيرا کات توبوه ري توا ده، تاء فيکير کات ساره،

بيني ري، تاء بوليه انق کران ري مندول، دق!

20 ابراهيم تاء فوتوس فرچاي، فس ري تاء شك هاتي حال فرجنجين

توهن تو. سبب توله ري کهور فوجي توهن، کهور قواٲ

21 فرچاي، کران ري يقين کات، توهن ار کواس بوليه بري سمفرن

22 فرجنجين ري. فس سبب ابراهيم فرچاي سمفي سکت تو، توهن

فون کيرا کات ابراهيم جاني اورغ هق تاء ساله دنداغن توهن.



- 23 فرکتان توهن ساءني: توهن فون کيرا کات بي اورغ هق تاءساله تو، توهن بري بوکن کا ابراهيم ساج،
- 24 تافي ري بري کا کيت گاتيقي، هق فرچاي کا توهن، هق بري عيسي، ربي کيت، هيدوف کليقي. دغن کيت فرچاي بالس تو، توهن کات، کيت تاء ساله ده دفنداغن دي.
- 25 کران دوسا۲ کيت، عيسي کنا حکوم بونوه. فس انتوق بري کيت تاء ساله دفنداغن توهن، عيسي هيدوف کليقي سمولا.

#### باب 5 کيت بوليه برهوبوغ جايي بائيك دغن توهن سمولا.

- 1 لاني کيت تاء ساله ده دفنداغن توهن، کران کيت فرچاي دغن ربي کيت، عيسي المسيح. سبب نيلاه، کيت بوليه برهوبوغ بائيك سمولا دغن توهن.
- 2 جادي عيسي المسيح نيلاه هق سوده بري کيت بوليه برهوبوغ دغن توهن بالس ني، بوليه تريما رحمة. لاني کيت بوليه فوجي توهن دغن سوک هاتي، کران کيت دوق ايغت کا فرکارا يغ مليا، هق توهن چادغ تاروه نق بري کا کيت.
- 3 فس لاگي، کيت بوليه فوجي توهن دغن سوک هاتي، کران سموا کسوساهن کيت جوگ. سبب کيت تاهو ده، کات، دغن کسوساهن ني، توهن نق اجر کيت بري برديري تکف.
- 4 دغن بري کيت برديري تکف ني فون، توهن سوده تيغوق ده هاتي کيت کات موليق، کران دي نق بري کيت هارف کا دي
- 5 سمات ۲. فس هرافن کيت ني تاءسيا۲. کيت بوليه هارف بالس ني دغن سبب کواس روح توهن، هق دي چوچور تورون کا هاتي کيت، نق بري کيت کابر سعمور، کات، توهن کاسيه کا کيت سموا.
- 6 کران بيلا سمفي کا ماس هق توهن سوده لتق دولو، ياءيت فد ماس کيت تاءليه تولوغ دي ري کيت سنديري، ولو کيت دوق درهاک

کا توهن سکالي فون، توهن بري جوڳ عيسو المسيح قربان پاوا کڻتي کيت.

7 ميسل، اد اورغ هق هاتي بتول، هق سمو اورغ حرمة. ولو اورغ حرمة کا دي فون، تنتوله تاء اد سياف ريلا سره پاوا، ماتي کڻتي اورغ هاتي بتول تو. فس، سئورغ لاڳي، بوات بائيك، هق سمو اورغ کاسيه. بڱکالي اد ساتو اورغ ريلا قربان پاوا، ماتي کڻتي اورغ تو.

8 تافي ايغتله! ستارا مان توهن تنجوق کاسيه کا مائسي کيت، اورغ بردوسا. تکه کيت دوق درهاک کا توهن لاڳي، المسيح قربان پاوا، ماتي کڻتي کيت.

9 کالو المسيح قربان پاوا ني، بري بوليه توهن کات کيت تاءساله ده، تکه کيت دوق درهاک بالس تو، لبيه ۲ لاڳي ماس کوء دافن، کيت هق تاءساله ده، نق بوليه لفس درفد مرک توهن، دغن سبب المسيح تو.

10 کران تکه کيت جادي سترو دغن توهن لاڳي، توهن بري کيت بوليه فاليع کليق برهوبوغ بائيك دغن ني سمولا، دغن کران انق دي ماتي تو. تنتوله لبيه ۲ لاڳي، کيت هق برهوبوغ ده دغن توهن، نق بوليه تريما سلامت فد ماس لاني، دغن کران عيسي دوق هيڊوف سلام ۲ تو.

11 فس اد سکارا لاڳي. عيسي المسيح، ربي کيت، بري کيت بوليه فوجي توهن دغن فنوه سوک هاتي، کران عيسي سوده بري کيت بوليه برهوبوغ جادي بائيك سمولا دغن توهن.

### دوسا مائسي ماري دمان؟

12 مولا ۲ دوسا تيمبول دالم دنيا دمائسي ساتو اورغ ساج، يائيت توء ادم. لفس تو، حکوم ماتي فون تيمبول ماري، سبب دوسا توء ادم ساءني. فس تو، کسموا مائسي کنا ماتي، کران

- مائنسي سموا تو ار دوسا دفنداغن توهن .
- 13 سسوغكوهش ، بلوم فد توهن تورون حكوم ۲ كا نبي موسي لاكي ، دوسا ار ده . فس ماس تو ، اورغ بوات دوسا ، تافي توهن تاء كيرا ساله حكوم دالم كتاب .
- 14 ولو بالس تو فون ، جق دماس توء ادم ، هيغك سمفي كا ماس نبي موسي ، مائنسي سموا تاء لفس فد حكوم ماتي . اورغ هق بوات دوسا لائين فد هق توء ادم بوات دوسا فون ، كنا ماتي جوگ .

### ادم دغن عيسي

- توء ادم جاري سروف چنتوه بري كيت فهم حال سئورغ هق ماري بلاكغ فد ري ، ياءيت عيسي المسيح .
- 15 تافي كدوان تاء سروف . فركارا هودوه ۲ هق تورون كا مائنسي كوء توء ادم ، لائين دغن رحمة هق تورون كا مائنسي كوء عيسي . كيت تاهو ده كات ، دغن سبب توء ادم ساتو اورغ بوات درهاك ، ري بوات بري سموا اورغ كنا تريما حكوم ماتي . تافي توهن تورون رحمة ري ، بسر لاكي فد درهاك تو ، نق بري رحمة ري سمفي كا سموا اورغ ، دغن سبب ساتو اورغ جوگ ، ياءيت عيسي المسيح .
- 16 سموا اورغ كنا حكوم ساله کران توء ادم سئورغ بوات ساله . تافي رحمة هق توهن تورون تو ، لائين . ري بري اورغ هق بوات ساله بايق جاي تاء ساله دفنداغن ري ، تاء كنا حكوم ماتي ، دغن کران عيسي سئورغ تو .
- 17 ساتو اورغ بوات دوسا ، ري بري سموا مائنسي دوق باوه حكوم ماتي . تافي تنتوهق عيسي المسيح بوات بسر لاكي ، کران سموا اورغ هق تريما رحمة توهن هق تاء ساله ده دفنداغن ري ، توهن بري فواق ني هيديوف سلام ۲ ، فس بوليه فرينته سكالې دغن عيسي المسيح .

19 تو ادم درهاک کا توهن . سبب تو ، باپق اورغ کنا تڱوڱ ساله  
دنداغن توهن . تافي عيسى طاعة کا توهن . سبب تو ، باپق  
اورغ جايي تاء ساله ده دنداغن توهن .

20 توجوان توهن تورون حکوم ۲ ري، نق بري ماءنسي کيت  
مڱاڪو کات، کهور تاهو حکوم، کهور هاتي کيت براس نق لغڙ  
حکوم تو. سوڱوہ فون ماءنسي روق بوات دوسا، کهور  
بايق، کهور بايق، تافي رحمة هق توهن تورون کا ماءنسي،  
کهور بايق لاڳي فد تو.

21 سسوغڭوهش دولو، مائىسي كيت سموا دوق باوه فرينته نفسو ۲  
جاھت بلاك. سور سكالى كنا ماتي. تافي توجوان توهن،  
ئي نق بري مائىسي كيت هق فرچاي كا عيسى المسيح، ربّي  
كيت، دوق باوه فرينته رحمة دي. سور سكالى تو، كيت تريما  
هيدوف چارا بارو، بغن كران كيت تاء ساله ده دنداغن توهن.

باب 6

1      سموا فرڪارا هق اڪو رويت ني سوڳوه. ڪالو بالس تو، ڪيت  
نق هيڊوف ڪو، جالن مان لاني؟ ڪيت دوق ڪاڇن نق      بوات  
دوسا لاڳي ڪه، نق بري توهن تمبه ڪهور بايق لاڳي، رحمة بي  
2      ڪا ڪيت؟ جاڻن بوات بالس تو! ڪيت لفس ده درفد فرينته  
طبيعة هق بردوسا، سروف اورغ ماتي ده.      نق ڪي بوات

دوسا باء اف فول ؟

3 فس روکون مندي بفتيزما تو، معنا ري مو ايغت کا رق ؟ معنائ  
بيلا فواق کيت سموا تريما روکون مندي تو، جادي تندا کات  
کيت توروټ جالن عيسى المسيح. معنائ، بيلا عيسى ماتي ده  
تو، سروف کيت ماتي کنا حکوم سکالي دغن ري.

4 فس معنا ري ار لاگي. جادي تندا کات کيت کنا بوبوه دالم  
قبور سکالي دغن المسيح. توجوان توهن باف کيت، ري نق  
بري کيت هيډوف کوټ جالن بارو لاني، سکالي دغن المسيح  
جوگ.

کيت کنا ماتي، کنا هيډوف، سکالي دغن المسيح

5 کالو کيت توروټ جالن سکالي دغن المسيح، تکه ري ماتي  
تو، تنټو له کيت نق بوليه تريما هيډوف چارا بارو سکالي دغن  
ري جوگ.

6 چارا حال کيت ماتي سکالي دغن عيسى تو، کيت تاهو ده کات  
طبيعة کيت هق سډيا تو، سوده کنا حکوم بونوه، سکالي دغن  
عيسى، دکايو امفت چابغ. توجوان توهن، ري نق بري  
هافوس هابيس، فرينته طبيعة بر دوسا دالم ډيري کيت، تاء  
بري کيت دوق سروف همب ري ده.

7 کران بيلا اورغ ماتي بالس تو، ري تاء دوق باوه فرينته طبيعة  
بر دوسا ده.

8 کيت بوليه فرچاي کات، سبب کيت کنا حکوم بونوه سکالي  
دغن المسيح، تنټوله کيت بوليه هيډوف سکالي دغن ري جوگ.

9 کيت فون تاهو کات، المسيح سوده ماتي، فس هيډوف کليق  
ري تاء ماتي ده، سبب تاء ار کواس مان ۲ بوليه بري ري ماتي

10 فول. ري ماتي سکالي ساج، انتوق بري مائسي لفس فد حکوم

11 دوسا. لاني ري هيډوف انتوق توهن ساج. فواق مو فون

سروف تو جوڳ. تکه مو دوق هيدوف لاني، مو کنا ايغت کات،  
سروف مو سوده ماتي ده، مو تاء کنا مئنا ده دغن حکوم دوسا  
تو. لاني مو هيدوف انتوق توهن ساج، سکالي دغن المسيح.

### جاغن بري طبيعة بردوسا مرينته دالم ديريمو

- 12 لفس فد ني، جاغن بري طبيعة بردوسا دوق مرينته دالم  
ديري مو، نق سوروه مو توروت هوا نفسو مو لاگي!  
13 جاغن بري طبيعة بردوسا فاکي توبوه بدان مو، نق بوات هق  
جاهت. تافي سرهله ديريمو کفد توهن، بري دي فاکي توبوه  
بدان مو بوات هق باءيک. کران لاني مو جاي اورغ هق  
هيدوف کليق ده.  
14 سبب توله، طبيعة بردوسا تاء کنا مرينته دالم ديري مو. لاني  
مو بوليه سلامت دغن رحمة توهن ساج، نق بوليه سلامت  
دغن توروت حکوم تورات تاءليه.

### کنا جاي همب هق توهن

- 15 سبب کيت تاء بوليه سلامت دغن توروت حکوم تورات،  
تافي بوليه سلامت دغن رحمة توهن بالس ني، موليق کا بق  
کيت دوق کاچغ بوات دوسا لاگي؟ تنتو تاء موليق.  
16 ايغتله! کالو مو توروت ساتو۲ اورغ، بوات اف۲ دي سوروه،  
معنائ مو جاي همب ني. سابيت توله، مو کنا فيليه، نق  
جاي همب طبيعة بردوسا که، اتوا نق جاي همب توهن.  
همب طبيعة بردوسا، سود سکالي ني کنا حکوم ماتي. همب  
هق طاعة کا توهن، سود سکالي، دي جاي اورغ هق توهن  
17 کات تاء ساله ده. تافي اکو تريما کاسيه کا توهن، کران فواق

- 18 ده. مو لفس ده درفد فرينته طبيعة بردوسا دالم هاتي. لاني  
 مو جادي همب توهن ده، انتوق بوات فركارا ۲ هق باءيك.  
 19 اكو فاكي فركتائن موده ارتي، كران مستحق فواق مو فهم  
 فغاچران ني. ماس دولو مو فاكي توبوه بدان مو جادي همب  
 نفسو مو سنديري، انتوق بوات هق كجي ۲ سعمور، دغن سمو  
 فركارا هق تاءموليق. تافي لاني مو كنا فاكي توبوه بدان مو  
 جادي همب كا توهن، انتوق بوات باءيك سعمور، كران نق  
 هيدوف انتوق توهن ساج.  
 20 فد ماس مو دوق باوه فرينته طبيعة بردوسا دالم هاتي دولو،  
 مو تاء جادي همب توهن انتوق بوات باءيك.  
 21 اف فائده فركارا ۲ هودوه هق مو بوات دولو تو؟ لاني، كالو  
 مو ايئت كا فركارا ۲ تو، مو نق براس مالو سلالو. تاءار فائده  
 سبب سور سكاللي، كنا حكوم ماتي.  
 22 تافي لاني مو تاء جادي همب طبيعة هق بردوسا توده. مو  
 جادي همب توهن، انتوق بوات فركارا ۲ هق توهن بركنن.  
 سور سكاللي، مو نق بوليه هيدوف چارا بارو.  
 23 اورغ هق جادي همب طبيعة بردوسا بوليه بالسن هق سورغ  
 فاتوت، ياءيت حكوم ماتي. تافي توهن هديه دغن كاسيه،  
 هيدوف يغ ككل كغد كيت، دغن كران عيسى المسيح ربّي كيت.

### باب 7 حكوم تاءار كواس اتس اورغ هق ماتي ده

- 1 اديق براديق سمو تاهو ده حكوم ۲ توهن. سبب تو، مو  
 بوليه فهم فركارا هق اكو نق رويت ني. كيت كنا دوق باوه  
 فرينته حكوم ۲ ني سهيڱ ماتي، باروله لفس.  
 2 ار حكوم توهن هق كات، اورغ بتينا كنا دوق باوه فرينته توء

- 3 لاكي دي . كالو لاكي دي ماتي ، اورغ بتينا فون لفس درفد حكوم تو . تافي تکه تو لاكي دي دوق ار لاكي ، كالو اورغ بتينا كي دودوق دغن اورغ لائين ، دي بوات زناء ، دي ساله حكوم توهن . بيلا لاكي دي ماتي ده ، اورغ بتينا بوليه كي منيكاچ دغن اورغ لائين ، تاءليه کات برزناء ، کران دي لفس ده درفد حكوم تو .
- 4 فواق مو فون سروف تو جوگ . مو لفس ده درفد حكوم توهن دغن سبب ماتي ، ياءيت فد ماس المسيح ماتي ، معنائ ، سروف مو ماتي سگالي دغن دي . فس لاني مو لفس ده ، تاء کنا دوق باوه فرينته حکوم ۲ سروف هق دولو . مو ماسوق ده دوق باوه فرينته المسيح ، هق توهن بري هيدوف کليق ده .
- توجوان توهن ، دي نق بري فواق مو بوليه بوات جاس بايق انتوق دي .
- 5 ماس دولو ، بيلا کيت هيدوف تورو طبيعة مائسي تو ، حکوم حکوم توهن بوات بري نفسو جاهت هق کيت کهور ار کواس ، هيغک سمفي دي بوليه فقسا توبوه بدان کيت ، بري بوات فرکارا ۲ هق بوليه جاس انتوق کنا ماتي ساج .
- 6 تافي لاني توهن بري کيت لفس توبيت درفد ليغکوغن حکوم ۲ دولو تو ، دغن کران کيت سوده ماتي سگالي دغن المسيح . لاني کيت کنا تورو توهن ، بوکن دغن جالن هق دولو ، ياءيت بوات تورو سموا حکوم هق کيت باچ دالم کتاب ، تافي دغن جالن هق بارو ، ياءيت تورو فرينته روح توهن .

#### اف فائده حکوم ۲ دالم کتاب تو؟

- 7 کالو بالس تو ، بغکالي ار اورغ کات : حکوم ۲ توهن جاهت ! جاغن فيکير بالس تو ! توهن فاكي حکوم ۲ دي تو ، نق بري مائسي تاهو کات ، هاتي دي بردوسا . ميسل ، کالو اکو تاء بياس دغر حکوم هق لارغ تاء بري طمع ، هاتي کو تاء تاهو کات



طمع تو جاري دوسا.

- 8 تافي بيلا اكو دغر ده، حكوم تاء بري طمع تو، طبيعة بردوسا هق اكو فون تيمبول سلالو، بري اكو كهوړ ۲ نق كا بارغ اورغ. كالو اكو تاهو حكوم ني، هاتي كو تاء كابر كات دوسا.
- 9 ماس دولو، بلوم فد اكو دغر حكوم توهن تو، هاتي كو دوق سنغ ۲، تافي بيلا اكو دغر ده حكوم تو، سوسهله! سبب طبيعة هق بردوسا سوده تيمبول دالم هاتي، هيلغ هق سنغ سلالو.
- 10 معنات حكوم ۲ هق باءيك، هق توجوان بي نق بري اكو سلامت، حكوم نيله هق بري هاتيكو كهوړ ۲ سوسه تروق، سمفي ماتي فون. سسوځكوهن، بوكن حكوم توهن هق بري اكو سوسه، تافي هاتي كو هق بردوسا تو، امبيق حكوم توهن نق تيفو بوات بري اكو كهوړ سوسه، سمفي كنا حكوم ماتي.
- 12 بالس نيله، كيت بوليه نمفق كات، حكوم ۲ توهن ني فركارا يغ سوچي، سموان تو سوچي، عاديل، باءيك.
- 13 كالو بالس تو، باءاف اكو كات، بارغ باءيك تو بري اكو سوسه سمفي كنا حكوم ماتي فون؟ تاءليه كات بالس تو! هق اكو كات، طبيعة بردوساله هق بري اكو جاني سوسه سمفي كنا حكوم ماتي، دغن امبيق فاكې حكوم ۲ توهن هق باءيك. بالس نيله كيت بوليه تاهو كات هاتي كيت بردوسا، فس بوليه تاهو ستارا مان جاهت هاتي ماء نسي كيت هق بردوسا تو.

---

ار كواس دالم هاتي هق لاون دغن فرينته توهن

---

- 14 كران كيت تاهو ده كات، حكوم ۲ توهن سموان ستوجو دغن كهندق توهن. تافي هاتي كو سنديري لائين، سليهيج دغن كهندق توهن. اكو دوق سروف همب، هق كنا توروب فرينته طبيعة بردوسا دالم هاتي كو.

- 15 فرکارا ۲ کهنڊق کو نق بوات، جاري تاء بوات. فرکارا ۲ هق  
اکو بنجي تاء سير بوات، اکو بوات جوگ. اکو تاء ليه رویت  
سبب اف جاري بالس ني.
- 16 کالو اکو بوات هق اکو تاء سير بوات، سبب هاتيکو کات ساله،  
معناں هاتيکو ستوجو دغن حکوم توهن هق لارغ تاء بري بوات
- 17 فرکارا تو. بتول بوکن؟ معناں بوکن ڊيري کو سڊيري نق  
بوات فرکارا تو، تافي طبيعة بردوسا دالم هاتي، هق فقسا  
بري بوات.
- 18 اکو تاهو ده کات، تاء ار سکارا هق باءيک دالم ڊيري کو، ياءيت  
دالم طبيعة ماءنسي کو. کهنڊق نق بوات باءيک فون ار،  
تافي تاء ار کواس نق بوات.
- 19 فرکارا موليق هق اکو نق بوات، تاء جاري بوات. فرکارا هوڊوه  
هق اکو تاء سير بوات فون، اکو بوات جوگ.
- 20 کالو اکو بوات فرکارا هق اکو تاء سير بوات، معناں بوکن اکو  
سڊيري بوات فرکارا تو، تافي طبيعة بردوسا هق فقسا اکو  
بوات.
- 21 ار ساتو کواس دوق فرينته دالم هاتي کو. بيلا نق بوات هق  
موليق، اکو هاله کا هق تاء موليق.
- 22 فراسائن دالم هاتيکو نق توروت فرينته توهن، کات موليق.
- 23 تافي ار ساتو کواس هق فقسا اکو بوات توروت ڊي سعمور.  
کواس نيلاه لاون دغن فرينته توهن، هق اکو مڱا کو کات  
موليق ساءني. کواس طبيعة بردوسا دالم ڊيري کو دوق تگن  
اکو سعمور.
- 24 جاري بالس نيلاه. هاتي اکو فولوس ني، برکنن نق توروت  
فرينته توهن، تافي هق اکو دوق بوات تاء سروف. طبيعة  
ماءنسي کو سوک توروت فرينته نفسو جاهت.
- 25 سوسه سوڱکوه اکو! سياف بوليه تولوغ اکو بري لفس درفد

کواس هق باوا، اگو ني کي سمفي حکوم ماتي؟ تريما کاسيهله کا توهن، دغن کران عیسی المسیح، ربي کيت! عیسی له هق ار کواس بري کيت لفس فد فرکارا ني.

دالم فرينته روح توهن

باب 8

- 1 اورغ هق ماسوق فرچاي دوق سهاتي سپاوا دغن عیسی المسیح، توهن کرت سين ده کات يي تاء جاتوه حکوم اتس
- 2 اورغ تو، کران کيت هق دوق سهاتي سپاوا دغن عیسی المسیح تو، دوق دالم فرينته روح توهن، هق بري کيت هيدوف چارا بارو. سبب توله، کيت لفس ده درفد فرينته حکوم ۲ توهن هق کات، کالو کيت بوات دوسا کيت کنا حکوم ماتي.
- 3 سسوغکوهش، حکوم تورات تاءليه تولوغ کيت، کران طبیعه هق بردوسا دوق فرينته دالم هاتي کيت. تافي توهن هنترانق یغ ساتر هق دي، تورون ماري جايي سئورغ مائسي سروف کيت. يي ماسوق دالم فواق کيت، اورغ بردوسا، کران دي نق هافوس دوسا بري هابيس. توهن جاتوه حکوم سما دوسا اتس انق دي هق جايي مائسي سروف کيت.
- 4 دغن بوات بالس تو، توجوان توهن دي نق بري کيت بوات توروت سما فرکارا هق حکوم توهن کات عاديل، ياءيت کيت هق توروت فرينته روح توهن دالم هاتي، بوکن توروت طبیعه هق بردوسا تو، دق!
- 5 کران اورغ هق توروت طبیعه مائسي دي، توجو کا سما فرکارا هق طبیعه تو سوک، تافي اورغ هق توروت فرينته روح توهن، توجو کا سما فرکارا هق توهن برکن.
- 6 فس اورغ هق توجو کا سما فرکارا هق طبیعه مائسي دي سوک، جايي دي کنا تريما حکوم ماتي. تافي اورغ هق توجو کا سما فرکارا هق روح توهن برکن، جايي، توهن بري دي

- هيدوف چارا بارو دغن سلامت سجهترا.
- 7 اورغ هق سوک توروت طبيعة ماء نسي دي ، جايي سترو دغن توهن ، کران دي تاء توروت فرينته توهن . کالو دي نق توروت توهن فون تاء ليه ، کران هاله کا طبيعة ماء نسي دي .
- 8 اورغ هق توروت طبيعة دي بالس تو ، نق بري توهن برکنن کا دي فون ، تاء ليه .
- 9 تافي فواق مو بوکن اورغ هق دودوق باوه فرينته طبيعة ماء نسي تو . مو اورغ هق دوق باوه فرينته روح توهن ، هق دوق ار دالم ديري مو . سياف دي تاء ار روح المسيح ساء ني دوق دالم ديري دي ، تنتواورغ تو تاء جايي ميليقي المسيح .
- 10 ولو توبوه بدان مو کنا ماتي کران دوسا فون ، تافي کالو مو سوده تريما المسيح دوق دالم هاتي ، معنائ مو تريما ده هيدوف چارا بارو . کران لاني توهن کات مو تاء ساله ده .
- 11 فس ، کالو روح توهن دوق دالم هاتي مو ، تنتوله دغن کواس دي توهن نق بري توبوه بدان مو هق کنا ماتي تو ، هيدوف سمولا ، سروف دي بري عيسي هيدوف کليقي ده .

### کيت جاري انق ۲ توهن دغن فساك يڭ مليا

- 12 دغن سموا فرکارا هق اکو رويت ساءني ، اکو نق بري اديق براديق فهم کات ، طبيعة ماء نسي کيت تاء ليه بوات سکارا هق نق بري کيت موليق . کيت تاء کنا ترلکت هاتي اف ۲ کا دي !
- 13 کالو کيت توروت طبيعة ماء نسي کيت ، تاء ليه اف ۲ ملينکن ماتي ، تافي کالو کيت تومفغ دغن کواس روح توهن ، کيت بوليه فوتوس درفد فرکارا ۲ جاهت هق طبيعة کيت سوروه بوات . بالس توله بوليه هيدوف چارا بارو دغن توهن .
- 14 کران سياف ني هق بري روح توهن فرينته دالم هاتي دي ، اورغ ۲ توله جايي انق ۲ توهن .

- 15 روح توهن هق فواق مو سوده تريما ني، ري تاء بري مو جايي همب سروف دولو، هق تاكوت توان ري نق جاتوه حكوم سعمور، نق! روح توهن نق بري مو فهم كات، مو جايي انق ۲ توهن، هق بوليه فغكيل توهن: ابا! معنائ ايه! ايه!
- 16 روح نيله هق جايي سقسي سكالې دغن هاتي كيت، كات، كيت جايي انق ۲ توهن سوغكوه. كيت هق جايي انق ۲ فون، بوليه تريما فساك يغ مليا، هق توهن جنجي نق بري كا سموا انق ۲ ري. فساك نيله كيت بوليه تريما سكالې دغن المسيح. كران تنتوله كيت هق كنا سوسه، كنا سيقسا، سكالې دغن المسيح لاني، نق دافت كمليان سكالې دغن ري جوگ، فد ماس دافن.
- 18 فد فيكيران اكو فولوس، كسوساهن كيت لاني، برت ستارا مان فون، تاء اف. كران ماس كوء دافن، بيلا توهن بري پات كا كيت، كمليان هق ري چارغ تاروه انتوق كيت، كيت نق براس كسوساهن تو ريغن ساج.
- 19 سسوغكوهن، سموا مخلوق هق توهن بري جايي، اتس دنيا اتوا اتس لاغيت فون، دوق ننتي، براس نق بري سمفي باغت ۲ هاري هق توهن نق بري پات، كمليان هق انق ۲ ري.
- 20 اتس سموا مخلوق تو، توهن جاتوه حكوم ده، كات، ري كنا براوبه جايي فونه هابيس. بوكن دغن كهندق مخلوق تو جايي بالس تو، دق! تافي دغن كهندق توهن. تافي سموا مخلوق ني تاء كنا جايي فونه سروف تو سعمور. اد هرافن هق موليق لاگي. ري نق دافت مليا، سكالې دغن انق ۲ توهن جوگ. فد هاري هق توهن نق بري انق ۲ ري تو لفس سوغكوه، درفد حكوم ساء ني، انتوق تريما كمليان ري.
- 22 سموا مخلوق توهن لاني دوق برادر، سروف اورغ بتينا دوق
- 23 ساكيت نق برانق. فس بوكن مخلوق ني ساج، هق دوق برادر، تكه ري دوق ننتي هاري تو. فواق كيت فون، هق

سوده تريما روح توهن ، براس بالس تو جوگ . کيت نق بري  
سمفي باغت ۲ ، هاري هق کيت دافت کملپان هق انق ۲ توهن  
يائيت هاري هق توهن نق بري توبوه بدان کيت سلامت دغن  
سمفرن . لاني توهن بري روح ري دوق دالم هاتي کيت جاي  
تندا کات تنتو توهن نق بري سمفرن سموا فرکارا ني .

### هراڤن يځ تنتو

24 لاني کيت دوق ننتي دغن هراڤن فنوه ، کات ، توهن نق  
بري سلامت دغن سمفرن . کالو کيت دوق هارڤ نق بوليه ،  
معناڻ کيت تاء بوليه لاڳي . تاء ار سياف دوق ننتي فرکارا هق  
ري بوليه ده .

25 بيلا کيت تاهو دغن تنتو کات ، کيت نق بوليه ساتو فرکارا ،  
هق تاء بياس نمفق لاڳي ، هراڤن توله بري کيت کاچغ ننتي  
هيڅگ سمفي کيت بوليه .

### روح توهن جاي فنولوځ کيت

26 فس سا لاڳي ، توهن بري روح ري جاي فنولوځ کيت جوگ ،  
کران هاتي کيت تاء قواة . ميسل ، بيلا کيت بردها کيت تاء تاهو  
بالس مان کنا بردها دغن توهن . ماس تو جوگ ، روح توهن  
سنديري مينتاء دعا انتوق کيت ، دغن سوارا دالم هاتي ، هق  
ماءنسي تاء فندي نق سبوت .

27 تافي توهن تاهو سموا فرکارا دالم هاتي ماءنسي . ري برکن  
فرکارا ۲ هق روح ري مينتاء تو ، سبب سموا فرکارا هق روح  
توهن مينتاء انتوق اورغ هق کاسيه کا توهن ، تنتو ستوجو  
دغن کهندق توهن بلاک .

کاسیه سایغ هق توهن تاء فوتوس

- 28 اورغ ۲ هق کاسیه کا توهن، هق توهن فغکیل توروت ري، دغن توجوان نق بري سمفرن کهندق ري دالم هيدوفن اورغ تو، کيت تاهو ده کات، فرکارا مان ۲ هق جادي اتس اورغ تو، توهن دوق اد سکالي دغن ري، نق بري دي بوليه باءیک دالم فرکارا تو.
- 29 سمو اورغ ني فون، توهن فيليه ده ري دولو ۲ لاکي. ري نق بري جادي سروف دغن انق یغ ساتو. توهن لتق انق یغ ساتو ري تو جادي کاکق توا، نق باواء ادیق ۲ سمو توروت ري کي.
- 30 فس فواق ني، هق توهن برکهندق دولو نق لتق بري جادي انق ۲ ري، تন্তو توهن بري کواس کا ري نق توروت توهن کاتیق. فس اورغ هق توهن بري توروت ري تو، تন্তو توهن کيرا کات تاء ساله ده. فس اورغ هق توهن کات تاء ساله تو، توهن نق بري کا ري کمليان سروف هق توهن.
- 31 کيت سوده فرهاتي کلیه سمو فرکارا هق توهن بوات انتوق کيت. فس هاتي کيت براس بالسمان؟ توهن دوق سبله کيت، تاء اد سیاف بوليه منع کالو برلاون دغن کيت.
- 32 ایغتله! توهن سایغ کا انق یغ ساتو هق ري. تافي ولو ري سایغ سکالي فون، ري بري انق ري کنا حکوم برت گنتي کيت. سابيت توهن کاسیه کا کيت ستارا تو، تন্তوله ري نق بري سمو فرکارا هق مولیق کا کيت کاتیق، دغن سبب ري بري ده انق ري تو.
- 33 سیاف ري براني چاري بوکو نق ادو کيت هق توهن سوده فيليه؟ تاء اد سیاف براني، کران توهن سنديري کات کيت
- 34 تاء ساله ده. سیاف ري نق جاتوه حکوم اتس کيت لاني؟

عيسى المسيح كه؟ رق! دياه هق يڄ ڪنا حڪوم ماتي، ڪنٽي  
 ڪيت. فس هق اد فائده لاکي ڪا ڪيت، بيلا عيسى هيڊوف ڪليق  
 ده تو، توهن بري ري ناءِ ڪا ڪمفت هق بوليه ڪواس فنوه،  
 سبله ڪانن ري. دسيتو ري دوق مينتاءِ دعا انتوق ڪيت سعمور.  
 35 سياف ري اد ڪواس بري ڪيت فوتوس درفد ڪاسيه سايڄ المسيح؟  
 تاءِ اد اف سڪارا بوليه بري ڪيت فوتوس. ڪسوساهن دوق تيمفا  
 ماري سڪليليڄ توبوه ڪيت، ڪيت تاءِ اره نق ڪامق، اورڄ بوات  
 پاڻ ڪا ڪيت تروق، مڪانن تاءِ، فڪاين فون تاءِ. سما  
 ڪسوساهن ني تاءِ ليه بري فوتوس ڪاسيه سايڄ المسيح ڪفد  
 ڪيت. ڪيت دوق دالم بهيا جوڳ، بڻڪالي سمفي ماتي، ڪنا  
 بونوه فون اد. سروف ايات دالم ڪتاب سبوت ڪات:

اورڄ دالم فواق ڪيت، ڪنا بونوه سعمور، ڪران ري  
 ڪاسيه ڪا توهن. فس اد اورڄ نمفق ڪيت ني سروف  
 ڪمبيڄ بيريج هق بوليه سمبليه.

37 تافي دالم سما ڪسوساهن سروف ني، ڪيت نق منڄ برجاي،  
 دغن سبب المسيح، هق ڪاسيه ڪا ڪيت!  
 38 ڪران اڪو يقين ڪات، ماتي اتوا هيڊوف فون، ملائڪه ۲ اتوا  
 جين شيطان فون، ڪواس مان ۲ دالم دنيا اتوا اخيره فون،  
 39 مخلوق مان ۲ فون دلاڻيت اتوا ربومي، تاءِ اد اف سڪارا بوليه  
 بري ڪيت فوتوس درفد ڪاسيه سايڄ هق توهن، هق ري بري  
 ڪا ڪيت دغن عيسى المسيح، ربي ڪيت!

باب 9 فولوس ايڻت ڪا اورڄ يهودي، بڻسا ري سنديري

1 اڪو ني جادي ميليق المسيح. سبب توله، اڪو تاءِ ليه  
 بوهوڄ. فس لاڳي، روح توهن دوق فيمفين هاتي ڪو، ري بري  
 اڪو تاهو ڪات هق اڪو رويت ني، هق سوڳوه.



- 2 ياءيت بيلا اكو ترايغت كا اورغ يهوي، هق جادي داكيغ داره اكو سنديري، اكو براس دوک چيتا سوغکوه. هاتي کو براس نق فچه، ايغت کا دي تو، هق تأسير توروټ عيسی المسيح.
- 3 اچي بوليه، نق بري توبوه بدان کو سومغه دتوهن، بري اكو فوتوس دغن عيسی المسيح، اصل بوليه اديق براديق کو، هق جادي سبغسا دغن اكو، برهوبوغ دغن توهن. تافي تاءليه !
- 4 بفسا اسرائيل کيت ني، جادي بفسا هق توهن فيليه، نق بري جادي انق دي. توهن يغ مهامليا فون توروټ دوق رافت دغن کيت، بري بفسا کيت بوليه برهوبوغ دغن دي. دي فون توروټ حکوم تورات کا کيت ني. دي بري کا کيت سموا اتوران بوات عمل عبادة، هق سوغ بوليه سمبه کا دي. فس، کيت تريما ده سموا فرجنجين دي، چارا حال جالن سلامت کوء دافن.
- 5 بفسا کيت ني، کتورونن فواق توء نينيق دوا بلس تو. فس المسيح هق توهن سوروه ماري کا دنيا، بيلا دي توروټ جادي مائسي، دي جايي سئورغ بفسا کيت جوگ. توهن هق دوق ميرينته سگل ۲ ني، فس کيت فون کنا فوجي کا دي سعمور. سغوتيله، امين.

### فرجنجين توهن تاء برگنتوغ فد مائسي

- 6 کيت تاءليه کات، لاني توهن تأسير بري هق دي جنجي دولو تو، دق ! کيت کنا ارتي کات، اورغ هق توهن فيليه جايي ميليق دي تو، بوکن سموا بفسا اسرائيل، دق !
- 7 سروف تو جوگ، بوکن سموا کتورونن نبي ابراهيم هق بوليه فساک سباگي انق ۲ توهن. ماس دولو، توهن رويت کا نبي ابراهيم، کات: انق چوچو اسحاق ساج، هق اکو لتق نق بوليه تريما فساک مو !

- 8 معنائ فواق هق توهن فڱگيل انق دي ، بوکن سموا ڪٽورونن  
ابراهيم ڪو ڊاگيڻ ڊاره دي ، دق . تافي سموا اورغ هق تورون  
ڪو ڄالن فرجنجين توهن ساج .
- 9 ڪران بيلا توهن ماري رويت ڪا ابراهيم ماس ڊولو ، چارا حال نق  
بوليه انق ، دي ڪات : بيلا سمفي ماس اڪو جنجي ، اڪونق ماري  
فول . فد ماس تو فون ، ساره نق برانق انق جنتن !
- 10 فس بوکن دغن ساره ساج . بيلا ربيقه ، بيني تو ڻينيق ڪيت
- 11 اسحاق تو ، برانق ڪمبر ، توهن رويت ڪا دي ، بلوم فد دي
- 12 برانق لاڳي ڪات : انق سولوغ مو نق فڱگيل ڪا اديق دي توان !  
ماس توهن رويت بالس تو ، ڊوا براديق تو تاء برانق لاڳي ، تاء  
بوات اف سڪارا لاڳي ، باء ڪ اتوا جاهت . توجوان توهن نق  
بري تنتو ڪات : دي نق فيليه مان ۲ سئورغ ، هق دي جنجي  
ڊولو ، ايڪوت ڪهندق دي . جاري سابيت توهن سوروه اورغ  
توروت دي ، بوکن سابيت اف ۲ اورغ تو بوات ، دق !
- 13 اينيله معنا هق توهن رويت ڊالم ڪتاب ، ڪات : يعقوب هق  
اديق تو ، اڪو ڪاسيه . عيسو هق ڪاڪق تو ، اڪو تاء ڪاسيه .

### نمفق سروف توهن تاء عاڊيل فيليه اورغ بالس تو

- 14 هق توهن بوات بالس تو ، نمفق سروف دي تاء عاڊيل ،  
تافي ڪيت تاء ليه ڪات بالس تو .
- 15 دغرله فرڪتائن توهن ڪا نبي موسي ڊولو :

اڪو ار ڪواس بوليه تنجوق ڪاسيه سايغ ڪا سياف ۲ فون  
ايڪوت ڪهندق ڪو ! توهن ڪات . فس اڪو ڪسياف بلس ڪا  
اورغ مان ۲ فون ، ايڪوت ڪهندق ڪو .

- 16 بالس توله ڪيت بوليه ارتي ڪات ، نق فيليه اورغ مان بوليه  
سلامت تو ، تاء برگنتوغ دغن ڪهندق ماء نسي ، اتوا دغن

فريواتن مائسي فون، تافي برگنتوڤ دغن كاسيه ساينغ هق  
توهن ساج .

17 فس فركتائن توهن دالم كتاب ار سا لاكي . توهن رويت كا  
فيرعون، راج مصير دولو، كات:

اكو لتق مو بري دودوق رتمفت مو، هيڤگ سَمفي  
ماس لاني . سبب نيله، اكو نق بوات كا توبوه بدان  
مو، بري اورغ نمفق كواس كو، توهن كات . فس اكو  
نق بري مشهور سرات دنيا حال نام اكو توهن ني .

18 سكت نيله چوكوف بري كيت ارتي كات، توهن كسياغ بلس  
كا اورغ اتوا دي بوليه بري اورغ كرس هاتي لاكي، ايڪوت كهندق  
دي .

### باءف توهن حكوم ساله كا كيت؟

19 بڱكالي ار اورغ نق تان فول: كالو مائسي تاءليه لاون  
كهندق توهن، بءاف توهن حكوم ساله كا كيت؟

20 اكو فولوس كات: هي مائسي! مو تاءسوغ فاتوت كيچيق  
بالس تو. مائسي مان براني بحس دغن توهن؟ كالو بنديغ،  
بارغ هق توڪڻ بوات، تاءليه تان توڪڻ: بءاف توڪڻ بوات روف  
كو بالس ني؟

21 توڪڻ هق بوات مڱوق فيڱن، ار كواس امبيق تانه ليات نق  
بوات ايڪوت سوڪ دي. دي بوليه امبيق ستوڱول تانه بوات  
فيڱن دوا بوتير. سبوتير موليق، تاروه فاکي هاري راي،  
سبوتير لاكي تو، كاسر سيڪيت، بوليه بوات فاکي هاري ۲ .

22 فس توهن بوليه بوات مائسي كيت ايڪوت سوڪ دي، سروف  
توڪڻ دغن مڱوق فيڱن سائي جوڳ. ار مائسي هق تاء  
ترفاكي. توهن كهندق نق بري نمفق مرڪ دي، نق جاتوه

23 حکوم کا فواق ني . ري نق بري تاهو کواس ري ، تافي ري صبر ،  
 ري تاء جاتوه حکوم سلالو ، بق ! کران ري نق بري تاهو جوگ  
 حال کملیان ري یغ لبیه ۲ تو ، هق ري نق تورون کا مائنسي ،  
 یاءیت کیت هق توهن کسياغ بلس ، هق ري لتق دولو ۲ لاگی  
 انتوق تريما کملیان ري تو .

24 فواق کیت له ، هق توهن سوروه توروت ري ، بوکن اورغ بفسا  
 يهوني ساج ، بق ! اورغ بفسا لاین ۲ فون ، توهن فيليه جوگ .  
 25 توهن سوده رويت حال کجادين ني دولو دالم کتاب نبي هوشيا  
 کات :

فواق هق تاءجادي ميليک کو ، اکو نق لتق جايي  
 ميليک کو ، توهن کات . فواق هق اکو تاء کاسيه دولو ،  
 لاني اکو نق بري جايي فواق هق اکو کاسيه .  
 فس رتمفت هق توهن بياس کات : فواق مو بوکن  
 ميليک کو ، رتمفت تو جوگ ، توهن هق ار کواس بري  
 هيديوف سلام ۲ ، ري نق لتق فواق تو بري جايي  
 انق ۲ ري !

27 نبي يعشيا بياس سرو حال بفسا اورغ اسرائيل کات :

اورغ اسرائيل بايق سروف فاسير دفنتي ، تافي اورغ  
 دالم فواق ني هق نق بوليه سلامت ، سيکيت ساج .  
 28 کران بيلا سمفي ماس ري ، توهن نق جاتوه حکوم دغن  
 سکليف مات ، سلالو ، اتس مائنسي سرات دنيا .

29 هق ني فون جايي سروف نبي يعشيا رويت دولو جوگ ، کات :

کالو توهن یغ مهاکواس تاء ار کسياغ بلس کا کیت ، بري  
 اورغ سيکيت ۲ سلامت ، نق بوليه کتورونن . . . . .

تنتو بغسا کیت کنا حکوم سروف بندر صودوم دغن  
بندر گموره ، هق توهن هافوس بري هيلغ هابيس تو!

بغسا اسرائيل براس نق سلامت کوء جالن لائن

- 30 فس کیت نق ارتي توجوان توهن بالس مان ؟ جاي بالس  
ني . بغسا لائن ۲ هق تاء تاهو جالن نق بري برهوبوغ جاي  
باءيك دغن توهن ، فواق ۲ نیله ، توهن بري بوليه برهوبوغ  
جاي باءيك دغن ري کوء جالن فرچاي کاعیسی المسيح .
- 31 تافي بغسا اسرائيل هق توهن سوده فیلیه تو ، دي راجين  
چاري جالن نق بوليه برهوبوغ جاي باءيك دغن توهن ، دغن  
توروت حکوم اوگام سموا ، تافي چاري بالس تو ، تاء تمو .
- 32 سابیت اف ري تاء تمو ؟ سابیت دي هارف دوق توروت سموا  
حکوم اوگام تو ، نق بوليه سلامت . دي تاء سير فرچاي کاعیسی  
المسیح . فس ري سنتوق دباتو هق توهن لتق تو .
- 33 سروف ار ايات دالم کتاب هق کات :

فرهاتي باءيك ۲ له ، توهن کات . اکو سوده لتق ساتو  
باتو هق بسر ، دتغه جالن کوت صیون . باتو ني نق  
بري سنتوق اورغ ۲ لالو ، نق بري دي ربه . تافي اورغ  
هق برديري اتس باتو تو ، هرافن ري کجت سوغکوه ،  
ري تاء جاتوه .

بغسا اسرائيل تاء فهم جالن هق توهن لتق

باب 10

- 1 يا ادیق برادیق کو! اکو دوق مینتاء دغن توهن ، دغن  
سوغکوه ۲ هاتي ، بري بغسا اکو ، اورغ اسرائيل بوليه سلامت  
کاتیق . اینیله کهندق هاتي کو! اکو بوليه رويت کات سوغکوه ،

اورغ اسرائيل راجين بوات عمل عبادة نق بري توهن برکنن کا  
 ئي، تافي هق ئي بوات تو، بوکن هق توهن سوروه سوغکوه.  
 3 جالن هق توهن لتق، نق بري ئي بوليه کات مائسي تاء ساله  
 تو، فواق ئي تاء فهم، تاء تاهو. ئي تورووت جالن لائين، هق  
 ئي سنديري. ئي تاء سير تورووت جالن هق توهن چارغ کا ئي.  
 4 جالن کنا تورووت حکوم ۲ دالم تورات، انتوق نق بوليه سلامت  
 تو، المسيح بوات بري ليسوس ده. لاني اورغ هق تورووت  
 جالن فرچاي کا المسيح تو ساج له، توهن کات تاء ساله ده  
 رنداغن ئي.

تاء ار سياف هق توهن تاء سير بري سلامت

5 نبي موسی رویت حال نق جاري تاء ساله رنداغن توهن  
 کوء جالن تورووت حکوم ۲ دالم کتاب. ئي کات:

کالو بوليه تورووت حکوم ۲ تو هابيس بلاک، تنتو بوليه  
 هيدوف دغن سلامت.

6 تافي نق جاري تاء ساله کوء جالن فرچاي کا عيسى تو، ار ايات  
 کات بالس ئي:

جاغن مو فيکير دالم هاتي، سياف ئي بوليه ناءيك کا شرگ؟

يائيت سروف مو سنديري کنا ناءيك امبيق المسيح توروون ماري،  
 7 دق! فس ايات تو کات لاکي:

جاغن مو کات: سياف ئي بوليه توروون کا عالم موت؟

يائيت سروف مو سنديري کنا توروون امبيق المسيح ناءيك درفد  
 تمفت ماتي تو. هق تو فون دق جوگ!  
 8 هق بتول سوغکوه بالس ئي:

خبر هق توهن تورون کا فواق مو، تاء کنا کي چاري  
جاءوه ۲، دق! خبر ني دوق ار دالم مولوت مو ده،  
فس سمفي کا هاتي مو گاتيقي.

يائيت خبر کات مو بوليه سلامت دغن فرچاي، خبر هق فواق  
اکو کي دوق مفاجر رات ۲.

9 معنائ، کالو مو مفاکو دغن مولوت کات، عيسي ديالہ ربّي،  
فس، کالو مو فرچاي دالم هاتي کات، توهن بري عيسي هيدوف  
کليق، تنتو مو نق بوليه سلامت.

10 کران کيت فرچاي دالم هاتي بالس ني، فس توهن رويت کات:  
اورغ ني تاء ساله ده دغنداغن اکو، توهن! فس بيلا کيت مفاکو  
دغن مولوت بالس ني فون، توهن رويت کات: اورغ ني بوليه  
11 سلامت ده! کتاب توهن رويت بالس تو جوگ، کات:

اورغ مان ۲ هق فرچاي کا دي، هرافن اورغ تو تاء سيا ۲.

12 اورغ بغسا مان ۲ فون، تاء کيرا کات اورغ ييهودي اتوا اورغ بغسا  
لائين ۲، توهن يغ سا، دي دوق مريسته اتس مائسي سروف  
سموا. فس رحمة دي تورون کا سمو اورغ هق مينتاء تولوغن  
13 دغن دي. کتاب توهن فون رويت بالس تو جوگ، کات:

اورغ هق فکغ کا نام ربّي، تنتو نق بوليه سلامت.

بالس مان توهن نق بري سمو اورغ دغر خبر يغ باءيك؟

14 تافي اورغ هق تاء ار فلواغ نق فرچاي کا عيسي لاکي، نق  
فکغ کا نام دي بالس مان؟ تنتو تاء ليه. فس، اورغ هق تاء  
دغر خبر دي لاکي، نق فرچاي بالس مان؟ تاء ليه جوگ. فس  
کالو تاء ار اورغ کي رويت خبر ني کا دي، فواق ني نق دغر

15 بالس مان؟ فس كالو توهن تاء سوروه اورغ كي، اورغ نق كي رويت خبر باءيك كا مائسي بالس مان؟ تنتو تاء ليه! تافي توهن سوروه اورغ كي ده، سروف ايات دالم ڪتاب رويت ڪات:

موليقله اد اورغ هق ماري رويت خبر باءيك.

16 تافي اورغ هق بوليه دغر خبر باءيك فون، بوڪن ڪات ماسوق هاتي سموا، دق! نبي يعشيا فون ڪات:

يا توهنڪو! دمان اورغ هق فرچاي خبر ڪيت رويت ني؟

17 بالس ني له ڪيت بوليه ڪات، اورغ فرچاي سابيت بي دغر. فس

اورغ دغر فون، سابيت اد اورغ ماري رويت چارا حال المسيح.

18 تافي اڪو نق تان سيڪيت، فولوس ڪات. فواق ني تاء ار فلواغ نق دغر ڪه، خبر هق توهن؟ تاء دغر باءاف! ڪتاب توهن ڪات:

بوپي سوارا اورغ كي رويت خبر ني بوليه دغر رات ۲ تمفت، فرڪٽان دي بوليه سمفي ڪا سموا اورغ.

19 ڪالو بالس تو، اڪو نق تان سيڪيت لاڳي، فولوس ڪات. اورغ يهوي، بڻسا اسرائيل تو، تاء ارتي ڪه، هق توهن نق رويت ڪا ري؟ دغر له فرڪٽان دالم ڪتاب نبي موسي، ديهاله هق مولا ۲ رويت ڪا اورغ اسرائيل، ڪات:

توهن نق بري فواق مو براس برڊڳي جوڳ ڪا بڻسا لائين ۲، هق مولا ۲ توهن تاء فيليه جادي بڻسا بي، تافي لاني نق توروت توهن. دي نق بري فواق مو براس فانس هاتي ڪران بڻسا لائين هق تاء ار علمو، بوليه ماسوق جادي ميلي توهن.

20 فس نبي يعشيا تاء تاڪوت رويت فرڪٽان توهن، نق بري تروس



ترغ لاڳي ، کات:

اورغ هق تاء بياس چاري جالن نق تمو دغن توهن ،  
توهن بري تمو ده . اورغ هق تاء بياس مينتاء نق کنل  
دغن توهن ، توهن بري کنل ده .

21 تافي چارا حال اورغ اسرائيل توهن کات بالس ني :

اکو هولور تاغن کو ، فغکیل فوق مو سياغ مالم تاء  
فوتوس ، تافي مو درهاک سعمور ، تاء سير طاعة کا اکو ،  
توهن کات .

باب 11 توهن نق کسياغ بس کا اورغ اسرائيل جوگ

1 کالو بالس تو ، سوغکوه کا دق ، توهن چابوت تولق سمو  
اورغ اسرائيل ، هق جاري ميليقي دي دولو تو؟ دق ! تاءليه کات  
الس تو! ايغتلہ ، اکو فولوس جاني بغسا اورغ اسرائيل جوگ . نبي  
ابراهيم جاني تو نينيق اکو ، اکو فون کتورون بينجامين هق  
فغکیل کا ابراهيم تو : تو پيغ .

2 تنتو توهن تاء چابوت بغسا کيت ، هق دي فيليه ده دري دولو  
لاڳي . ايغتلہ کا چريتا نبي الياس دالم کتاب . الياس دوق ادو  
سمو کسلاهن اورغ اسرائيل کا توهن . الياس کات :

3 يا توهنگو! فوق ني بونوه نبي ۲ توهن . دي بوات  
خيانة بري فونه هابيس ، سمو تمفت قربان کا توهن ،  
سهيغک تيغکل اکو سئورغ هق تورو توهن .  
فس فوق تو نق ماري امبيق پاوا کو جوگ !

4 تافي توهن جواب لاگو مان کا الياس ؟ توهن کات :

دق! ار توجوه ريبو اورغ لاڳي، هق اكو جاگ انتوق  
ديري كو. فواق ني تاء بياس سمبه كا برهالا بعيل تو.

5 فس سمفي كا ماس كيت لاني فون، فولوس كات، جايي سروف  
تو جوگ. دالم فواق اسرائيل كيت، ولو تاء براف بايق مان  
فون، تافي ار اورغ هق توهن فيليه نق بري سلامت، کران  
کسیاغ بلس ساج.

6 توهن فيليه بلس ني، بوکن سابيت اف ۲ هق اورغ تو بوات،  
دق! کالو مائسي بوليه بوات اف ۲ بري توهن فيليه دي،  
کيت تاء ليه کات، دي بوليه سلامت کران توهن کسیاغ بلس  
ساج، بوکن؟

7 سکت نيله، کيت سوده رويت کات: بغسا اسرائيل سمو تاء  
بوليه هق دي دوق چاري تو. ار جوگ سفواق دالم بغسا  
اسرائيل تو، هق توهن فيليه نق بري بوليه سلامت. تافي  
کباپکن اورغ جايي کرس فروت، تاء سير تورت هق توهن  
رويت. سروف ايات دالم کتاب هق کات:

8 توهن بري هاتي اورغ تو بيغوغ، هيغگ سمفي لاني.  
مات فون تاء نمفق، تليغا فون تاء دغر، اف ۲ هق  
توهن رويت.

9 فس نبي داءور رويت حال فواق ني جوگ، کات:

تکه دي دوق ماکن جاموان دغن سوك هاتي فون،  
مينتاء بري دي تيبام کنا ايگت، سروف بوروغ کنا  
جبق، سروف بناتغ کنا فرغکف. تکه بلغ برجالن  
فون بري دي سيمفت ربه، بري دي تريما بالسن  
هق سوغ دغن هق دي بوات تو . . . . .

يا توهنكو! بري مات ني كلايو، تاءليه نمفق هق چره .  
بري توبوه ني تاءليه بغه، کران تڭوڭن ني برت ساعت.

10

### بغسا لائين ۲ بوليه تريما سلامت

11 کالو بالس تو، سوڭکوه کا دق، بيلا اورغ يهودي جاتوه

تمفت ني، معنان ني تاءليه ناءيك کليق که؟ دق! تاءليه کات  
بالس تو. سسوڭکوهن، سبب اورغ يهودي جاتوه دالم کسلاهن  
ني تو، باروله بغسا لائين ۲ ار فلواغ نق بوليه سلامت. توجوان  
توهن، دي نق بري اورغ يهودي کنا برڊڭي کا بغسا ۲ تو فول.

12 تافي فيکيرله! بيلا اورغ يهودي جاتوه دالم کسلاهن ني تو،  
سموا مائسي بوليه کاي. بغسا لائين بوليه رحمة بايق سبب  
اورغ يهودي کورغ فرچاي. کالو بالس تو، بيلا بيلاڭن اورغ  
يهودي هق نق فرچاي چوکوف ده، ماس دافن، بايق مان لاڭي  
رحمة هق توهن نق بري کا مائسي؟ تاءهايس نق کيرا!

### فولوس کيچيق دڭن ادیق برادیق بغسا لائين ۲ فول

13 لاني اکو دوق کيچيق دڭن ادیق برادیق بغسا لائين ۲، بوکن

دڭن اورغ يهودي. کران اکو جاي اورغ هق باواء تيته توهن  
انتوق فواق مو. فس اکو براس بسر هاتي نق ماري کرج دڭن  
14 فواق مو کاتيک. تافي کهندق هاتي کو، اچي بوليه بري ستغه  
اورغ دالم فواق اورغ يهودي کو برڊڭي کا فواق مو، براس نق  
کاتيک هق مو بوليه ده، ياءيت سلامت.

15 کران فيکيرله! بيلا توهن بواغ اورغ يهودي توبيت، سموا مائسي

بوليه برهوبوڭ جاي بائيك سمولا دڭن توهن. کالو بالس تو، بيلا  
توهن تريما اورغ يهودي کليق سمولا، نق جاي بالس مان فول؟  
جاي سروف کيت تيغوق اورغ ماتي هيڊوف کليق سمولا!

- 16 اڪو نق بنديغ سيڪيت لڳي. بيلا اورغ بوات روتي، فس امبيق سڪرت دولو، ڪي سنبه ڪا توهن، جاني تنڊا ڪات سموا روتي تو بارغ سوچي انتوق توهن. فس فوهون ڪايو فول. ڪالو هومبي جاني بارغ سوچي انتوق توهن، معنائن ڏاهن ۲ فون جاني سوچي انتوق توهن جوڳ.
- 17 بڻسا يهودي جاني سروف فوهون هق سڊيا، ڏاهن ۲ ري ڪنا توتوه ستغه. فس توان فوهون تو امبيق انق ۲ هق تومبوه سنڊيري، ماري ڪهوين دغن فوهون هق سڊيا سائي تو. فواق مو فون بوليه بنديغ دغن انق ۲ هق بارو ڪهوين دغن فوهون سڊيا تو. لاني مو دوق لڪت ده دفوهون بڻسا يهودي. مو دوق ماڪن جاس ري، سروف انق ۲ هق بارو ڪهوين ماڪن اير دفوهون سڊيا تو.
- 18 سابيت توله، جاغن مو ڪيچيق بسر، نق هينا ڪا ڏاهن هق ڪنا توتوه دفوهون تو، يائي ڪا بڻسا يهودي. ايغته! بوڪن ڏاهن هق فيرا هومبي، جاني هومبي هق فيرا ڏاهن ۲ يائي فواق مو.
- 19 بڻڪالي مونق ڪات: سوڱوه، تافي ڏاهن تو ڪنا توتوه، انتوق بري اڪو ماري ڪهوين دفوهون، نق ڪنتي ڏاهن تو!
- 20 موليقله! تافي جاغن مو لوف، ڏاهن ۲ تو ڪنا توتوه دغن سبب ري تاء سير فرچاي. فواق مو فون ماري دوق رتمفت ڏاهن هق توتوه سائي تو، دغن سبب مو فرچاي ساج، تافي جاغن مو بسر ڪا ڊيري ڪات مو دوق بالس تو. بائيڪ مو تاڪوت ڪا توهن سيڪيت!
- 21 اورغ يهودي هق تاء فرچاي تو، توهن تاء بري ري بوليه سلامت، ولو ري جاني ڏاهن ۲ هق سجاتي فون. ڪالو مو فوتوس فرچاي، توهن نق بري مو بوليه سلامت ڪه؟ تننودق جوڳ!
- 22 فرهاتيله بائيڪ ۲ بالس مان توهن ڪسياغ بلس، فس بالس مان

23 ٻي جاتوه حڪوم. فواق هق جاتوه دالم ڪسلاهن تو، توهن حڪوم برت. فواق مو فون توهن ڪسياغ بلس سعمور، ڪالو مو دوق توروٽ ٻي. تافي ڪالو مو تاءُ توروٽ، توهن نق ڪرت فوتوس. فس اورغ يهودي هق ڪرت ده، ڪالو ٻي ٿيڳل جالن هق ٻي تاءُ سير فرچاي تو، توهن نق امبيق ٻي بري ٻي ڪهوين دغن فوهون سديا فول. ڪران توهن بوليه بوات بلس تو، بوڪن؟

24 سڪت نيلاه ڪيت بوليه ارتي، فواق مو بڻسا لائين ۲ تو جاري سروف داهن دفوهون هق تومبوه سنديري دالم هوتن. اورغ ڪي ڪرت امبيق ماري ڪهوين دغن فوهون موليق هق اورغ دوق بلا. بوات بلس تو فون، ساله عاده جوڳ. فواق اورغ يهودي فول، ٻي جادي سروف فوهون هق اورغ بلا ده. داهن ۲ ٻي هق ڪنا ڪرت تو، موده ساج ڪالو توهن نق امبيق ڪهوين ڪليق دفوهون سديا هق ٻي سنديري تو، بوڪن؟

### توجوان توهن دغن اورغ يهودي ماس دافن

25 هي اديق براديق ڪو! دغن بنديغن فوهون سائي، اڪو نق بري مو تاهو فرڪارا هق بارو دغد توهن، هق مو تاءُ بياس دغر. ڪران تاڪوت، ڪالو مو توروٽ فيڪيران مو سنديري، مو نق فهم ساله. فرڪارا هق بارو ني، ياءُ ٻيٽ بڻسا اسرائيل نق دوق هاتي ڪرس بلس ني سهيڱ سمفي ماس هق بڻسا لائين ۲ تو، بيلاغن ٻي هق نق ماسوق دالم ميليق توهن، چوڪوف ده.

26 باروله بڻسا اسرائيل سموا بوليه تريما سلامت ڪاتيڪ. ڪتاب توهن رويت حال فرڪارا ني ڪات:

ٻي هق بري فواق اسرائيل سلامت نق ٽيمبول دالم ڪوت  
صيون. ٻي نق بواغ ڪجهاتن دالم هاتي فواق يعقوب ني.

27 فس، توهن کات، بيلا اكو سوده هافوس سموا دوسا دي  
بري هابيس، اكو نق جنجي دغن دي بري کس.

27

28 دغن سبب بفسا يهودي تاء سير تريما خبر يغ بائيك، جاي  
سروف دي سترو دغن توهن، کران توهن نق بري فلواغ کا  
بفسا لائين تريما خبر ني دولو. تافي دغن سبب توهن سوده  
فيليه بفسا يهودي ني، فس ايئت کا فواق تو نينيق دي دولو،  
توهن کاسيه سوغکوه کا فواق ني.

28

29 کران بيلا توهن. فيليه اورغ مان ۲ انتوق تريما سموا رحمة دي،  
توهن تاء موغکير جنجي.

29

30 دولو، فواق مو هق جاي بفسا لائين، تاء ار طاعة کا توهن.  
لاني مو بوليه تريما ده کسياغ بلس هق توهن، کران اورغ  
يهودي تاء سير طاعة تو.

30

31 اورغ يهودي فون نق جاي سروف تو جوگ. لاني دي تاء طاعة  
کا توهن، تافي توجوان توهن، دي نق بري بفسا يهودي ار  
فلواغ بوليه تريما کسياغ بلس هق دي، کران فواق مو سوده  
تريما ده دولو.

31

32 بالس نيله، توجوان توهن نق بري سموا مائسي نمفق کات  
دي دوق باوه کواس طبيعة دي، هق بري دي تاء طاعة کا  
توهن تو. سور سکالي توهن نق بري سموا مائسي بوليه  
سلامت، کران کسياغ بلس دي ساج.

32

---

فوجيله کفد توهن!

---

33 بايق سوغکوه ۲ رحمة توهن! دي ارتي سموا دغن سمفرن،  
علمو دي دالم. توجوان توهن، مائسي کيت تاء فندي نق  
کامق.

33

34 سروف ايات دالم کتاب کات:

ٽاءار سياف بوليه تاهو فيڪيران توهن ،  
ٽاءار سياف بوليه نصيحة کا ري ،  
ماءنسي ٽاءار اف سڪارا هق ري بوليه بري  
کا توهن ، نق بري توهن بالس کليق کا ري .

35

36 سموا فرڪارا هق ار ، توهن بري جاني . سموا هق توهن بري  
جاني تو فون ، دوق دالم کواس ري ، فس توجو کا ري بلاک .  
فوجيله توهن يڄ مهامليا ، بوات سلام ۲ ! سڄوتيله ، امين .

### سرهله ديريمو کا توهن

### باب 12

1 هي اديق براديق کو ! کران توهن سوده تورون رحمة ري  
رڻ تنجوق کسياڄ بلس ري کا فواق مو بايق گيتو لالو ، اکو  
نق سوروه اديق براديق جوگ ، سرهله ڊيري مو کا توهن ،  
سروف مو قربان ڊيري مو نق هيڊوف انتوق توهن ساج ، کو  
جالن ري برکن . اينيله چارا هق سبئر ، هق سوڄ انتوق  
کيت نق سمبه کا توهن .

2 جاڻن مو توروٽ چنتوه دنيا هق معصية تو ، نق بوات  
سروف ري . مو کنا سره ڊيري مو کا توهن ، بري ري توکر  
سموا فيڪيران دالم هاتي مو بري بارو . بالس توله ، مو بوليه  
فرهاتي کليه اف کهندق توهن هق مو کنا بوات ، ياءيت  
سموا فرڪارا هق موليق ، هق توهن برکن ، هق چوکوف  
سمفرن انتوق مو .

3 کران رحمة هق توهن سوده بري کا اکو ، سابيت تو اکو براني  
سوروه فواق مو کنف ۲ اورڄ ، کات ، جاڻن مو بسر کا ڊيري  
مو لبیه فد هق سوڄ فاتوت . مو کنا تيمبڄ هاتي مو ،  
جاڻن برت ريڄن ، ستارا مان توهن تورون رحمة ري کفد مو ،  
سنارا تو جوگ ، مو تريماله رڻن فرچاي .

- 4 کران توبوه مائسي اتس اورغ تو ار بايق اغکوت، تيف ۲ اغکوت ار کرج ري ماسيغ ۲. هق تو کرج تو، هق ني کرج ني.
  - 5 فواق کيت بايق اورغ فون جاي ساتو توبوه، سبب کيت سموا دوق سهاتي سپاوا دغن المسيح. فس کيت دوق برهوبوغ مو اکو سروف اغکوت دالم توبوه.
  - 6 سبب نيلاه، نعمة هق توهن تورون اتس ديري کيت ماسيغ ۲، کيت کنا فاکيله، انتوق ادیق برادیق کيت. کالو توهن بري کيت فندي ميمغي فرمان توهن، کيت کنا رويته بري اورغ دغر، سکت مان هق توهن بري کا کيت تريما دغن فرچاي.
  - 7 کالو توهن بري کيت کرج انتوق ادیق برادیق، کيت کنا بواتله کرج تو دغن راجين. کالو فندي مفاجر، کنا مفاجر.
  - 8 اورغ هق فندي بري ادیق برادیق کرس سماغث، کنا کي تولوغله بالس تو. اورغ هق ار هرت، نق بري کا ادیق برادیق هق تاءار، کنا بري دغن اخلاص هاتي. اورغ هق جاي کاکق فواق المسيح فون، کنا دوق جاگ موليق ۲. فس اورغ هق ار کرج نق تولوغ اورغ سوسه، کنا بوات کرج ني دغن سوک هاتي.
- 
- ادیق برادیق دالم فواق المسيح کنا کاسيه مو اکو
- 
- 9 کاسيه مو اکو ني، کنا کاسيه دغن سوغکوه ۲ هاتي. مو کنا بنچي کا هق جاهت. بري هاتيمو ايغت کا هق موليق.
  - 10 ادیق برادیق دالم فواق المسيح کنا دوق کاسيه مو اکو سروف اورغ کاسيه کا وارييس ۲ ري سنديري. فس کيت کنا چاري جالن نق بوات حرمة کا ادیق برادیق کيت سعمور.
  - 11 جاغن بري لمه سماغث، تافي بوات سروف افي ميالا، قواة دغن کواس روح توهن، نق بوات کرج انتوق توهن.
  - 12 مو کنا سوک هاتي سعمورله! کران ايغت کا هرافن مو هق



- تنتو سوڱوه . کالو جاتوه دالم کسوساهن اف ۲ فون ، مو تاء  
کنا تاکوت ، مو برديري تگفله ، فس مو کنا مینتاء دعا سعمور .  
13 کالو ادیق برادیق دالم فواق المسیح کورغ اف ۲ ، تولوغلہ یی .  
چاری جالن اجق اورغ ماری کا رومه مو بیلا ۲ فون .  
14 اورغ هق بوات پاڻ کفد مو ، مو کنا مینتاء توهن تورون رحمة  
اتس یی . مینتاء بالس توله ، جاغن مینتاء بری توهن مرک کا یی !  
15 بیلا سائین سوک ، مو کنا سوک سکالی دغن یی . بیلا سائین  
تریاق فون ، مو کنا توروټ سدیہ کاتیق .  
16 مو کنا دوق سنغ مو اکو . مو جاغن سومبوغ . کالو تمو دغن  
کرج ترهینا فون مو کنا بوات جوگ . جاغن تنجوق چریدیق  
دافن اورغ لائین .  
17 کالو اورغ بوات ساله کفد مو ، جاغن مو بالس جاهت کا یی .  
چوب بوات فرکارا هق سموا اورغ بولیہ کات بتول .  
18 اچی بولیہ ، بالیق هاتی مو ، دوقله بائیک دغن اورغ سعمور .  
19 ادیق برادیق کو ، جاغن مو براس گرم ، نق بالس اتس اورغ  
هق بوات جاهت کفد مو . بلرله ، بری توهن مرک کا یی  
سرورف کتاب توهن رویت ، کات :

اکو نق حکوم کا اورغ هق بوات جاهت .  
اکوله نق بالس کا یی ، توهن کات .

- 20 تافی کیت کنا بوات توروټ کتاب توهن هق کات بالس نی :

بیلا سترو مو دوق لافر ، مو کنا بری ماکن کا یی .  
بیلا یی دهاگ ایر ، بریلہ ایر کا یی مینوم .  
کالو مو بوات دغن کاسیہ بالس نی ، سترو مو تنتو  
یی نق کابر کات یی ساله ساغت .

- 21 جاغن مو بری هاله کا هق جاهت . مو کنا بالس بائیک کا یی ،

فس هق باءيك تو نق منغ.

### باب 13 اورغ هق كراچان لتق جاني كتوا كيت

- 1 سموا اورغ كنا توروت فرينته كتوا ۲ هق كراچان لتق انتوق كيت. كران تاءار سياف بوليه ناءيك كا تمغت يي تو، ملينكن توهن بئر بري كا ري. فواق هق روق ميرينته كيت فون، جاري توهن هق سوده لتق ري ده.
- 2 سابيت توله، افبيل كيت لاون دغن فواق هق جاني كتوا كيت، سروف كيت لاون دغن هق توهن لتق ده. فس كالو كيت بوات بالس تو، توهن نق جاتوه حكوم اتس كيت.
- 3 فواق كتوا ۲، بوكن ري نق بري تاكوت اورغ هق بوات باءيك، دق! تافي ري نق بري اورغ هق بوات ساله تاكوت كا ري. كالو مو تاءا سيرا سبب كا تاكوت كا كتوا، مو كنا بوات هق موليق، بوكن؟ فس كتوا فون نق فوجي كا فواق مو سعمور.
- 4 كران كتوا تو كرج هق توهن سوروه، انتوق جاگ فواق مو. تافي كالو مو بوات ساله، مو كنا تاكوت كا ري، كران يي ار كواس بوليه جاتوه حكوم اتس مو سموا. ري كرج هق توهن سوروه، بالس جاهت كا اورغ هق بوات جاهت، نق بري تاهو كات، توهن مرك كا اورغ هق بوات جاهت تو.
- 5 سابيت توله، مو كنا توروت فرينته فواق هق كراچان لتق جاري كتوا مو تو. بوكن سابيت مو تاكوت كنا دندا ر توهن ساج، دق! تافي سابيت هاتي مو تاهو كات بتول، مو بوات بالس تو. فس سا لاگي، مو كنا باير حاصل سموا هق فواق كتوا ۲ سوروه، كران بيلا يي بچارا سموا فركارا ني، ري فون كرج هق توهن سوروه.
- ۶ بريله كا تيف ۲ اورغ هق مان فاتوت انتوق ري، اورغ هق ماري كوتيف حاصل توبوه، بايرله كا ري. اورغ هق ماري

کوتيف حاصل رومه فون، بايرله کا ري جوگ. اورغ هق فاتوت  
کنا حرمة، حرمتله کا ري بلاک.

### جالن تنجوق کاسيه مو اکو

- 8 جاغن مو تراوتغ دغن اورغ مان ۲ فون، تافي مو کنا تراوتغ  
کاسيه مو اکو سعمور. فس کاسيه ني جايي سروف اوتغ هق  
تاء هابيس نق باير سعمور. اورغ هق کاسيه کا سمو اورغ  
بالس ني، جايي کبتولن دغن حکوم توهن دالم تورات.  
9 کران حکوم ۲ توهن هق لارغ بوات، سروف بوات زنا، بونوه  
اورغ، چوري طمع اتوا لاین ۲ لاکي، کيت بوليه رويت دغن  
ريغکس بالس ني:

مو کنا کاسيه کا سام ۲ مائسي سروف مو کاسيه  
کا ډيري مو سنديري.

- 10 کيت تاء بوات ساله کا اورغ هق کيت کاسيه، بوکن؟ سابيت  
توله، دغن کاسيه ني کيت بري سمفرن حکوم ۲ توهن.  
11 فس لاکي، مو تاهو جوگ کات، دکت ده ماس هق مستحق انتوق  
کيت. جايي فرياغ کيت کنا باغون تيدور، دوق سيمفن نق کي،  
کران ماس هق توهن نق بري سلامت کهور ۲ دکت سعمور.  
لاني دکت فد هاري هق کيت بارو فرچاي دولو تو.  
12 لاني فرياغ گلف دکت نق هابيس، فرياغ چره دکت نق سمفي.  
باءیک کيت تيغل سمو فرکارا هق اورغ سوک بوات دالم گلف،  
کيت امبيق فاکي سنجات هق فاتوت کنا فاکي دالم چره.  
13 کيت کنا تورو جالن هق سوغ دغن هق دوق دالم چره.  
جاغن ماکن ارق رامي ۲ نق بري مابوق. جاغن ماین جنتن  
بتينا، جاغن بوات فرکارا بري اورغ لاین مالو. جاغن دوق  
برباله، بردغکي سام سنديري. دق! مو کنا امبيق فاکي سنجات

هق رٻي عيسى المسيح بري كقد مو. جاڻن مو بلا طبيعة  
بردوسا مو، نق بري فواس هوا نفسو مو!

باب 14 جاڻن حڪوم ساله كا اديق براديق مو

- 1 اورغ دالم فواق المسيح هق فرچاي تاء قواة لاکي، فواق مو  
کنا تريماله جاني اديق براديق مو جوگ. تافي جاڻن موبحس  
چارا حال هق اديق مو تو دوق فکڻ لاکي.
- 2 ميسل کات، ار اورغ هق قواة فرچاي، سابيت تو ري بوليه  
ماکن بلاک. جاڻن ري فندڻ رنده کا اديق ري، هق فرچاي  
تاء قواة لاکي، سابيت تو، ري تاء سير ماکن بلاک، نق ماکن  
سايور ساج.
- 3 فس اورغ هق ماکن سايور ساج فون، جاڻن ري حڪوم ساله  
کا کاکڻ ري هق کات ري بوليه ماکن بلاک. کران توهن سوده  
تريما دوا اورغ تو سروف.
- 4 باء اف مو دوق حڪوم ساله کا همب اورغ لائين؟ جاري توان  
ري سنديري هق بوليه کرت سين اتس ري، کات ساله اتوا  
بتول. فس تنتو اورغ ني نق کات تاء ساله، کران توان ري  
رٻي عيسى سنديري، هق ار کواس بوليه بري ري تاء ساله.
- 5 فس ميسل کات، ار اورغ دالم فواق المسيح هق فکڻ ساتو  
هاري کات سوچي فد هاري لائين. فس اورغ لائين فول کات  
سموا هاري سوچي بلاک. باء يک بري گنف ۲ اورغ تتف دالم  
هاتي، هق مان ري فرچاي، فس تورت هق تو.
- 6 ايغتله! اورغ هق کات ساتو هاري سوچي فد هاري لائين ۲،  
توجوان ري، نق حرمة کا رٻي عيسى، بوکن؟ فس اورغ هق  
دوق ماکن سموا فرکارا ساء ني فون، ري نق حرمة کا رٻي جوگ  
بوکن؟ کران ري ماکن بارغ تو دغن اوچف تريما کاسيه کا  
توهن. فس اورغ هق تاء سير ماکن هق تو، هق ني، ري

بوات بالس تو، نق حرمة کا رٻي دغن اوچف تريما کاسيه کا توهن جوگ.

7 تاءار سياف دالم فواق کيت هق هيڊوف اتوا ماتي فون انتوق

8 ڊيري بي سنڊيري ساج. تکه کيت دوق هيڊوف، کيت هيڊوف

انتوق رٻي عيسى. فس بيلا کيت ماتي فون، کيت ماتي انتوق

رٻي جوگ. کران هيڊوف اتوا ماتي فون، کيت جاري ميليق

رٻي عيسى بلاک.

9 کران توجوان عيسى المسيح ماتي فس هيڊوف کليق سمولا،

يائيت بي نق جاري رٻي هق بوليه فرينته اتس اورغ هيڊوف

دغن اورغ ماتي.

10 کالو بالس تو، هي اديق! باءاف مو نق حکوم ساله کا کاکق مو؟

فس مو هق جاري کاکق، باءاف مو فندغ هينا کا اديق مو؟

ايغته، کيت سموا کنا برڊيري دافن توهن، هق نق جاري

11 حاکيم کيت. کران ار ايات دالم کتاب کات:

اکوله توهن هق تاءار اوال، تاءار اخير. تنتوله

ماءنسي سموا نق سجور حرمة دافن کو، سموان نق

مڱاکو کات، اکوله توهن.

12 بالس نوله، کيت گنف ۲ اورغ کنا جواب ماسيغ ۲ کا توهن چارا

حال ڊيري کيت سنڊيري.

جاغن بري اديق مو گليچوه جاتوه دالم دوسا

13 سابيت توله، هي اديق براديق کو، لفس فد ني، جاغن

کيت کات اورغ تو ساله، اورغ ني ساله، دالم فواق کيت.

باءیک کيت کرت دالم هاتي کات، جاغن کيت بوات اف سکارا،

هق نق بري اديق کيت تو سنتوق گليچوه جاتوه دالم دوسا.

14 اکو دوق سهاتي سپاوا دغن رٻي عيسى. سبب توله اکو يقين

- کات، لاني تاءار بارغ حرام بارغ حلال انتوق کيت. تافي کالو  
اديق براديق سئورغ براس کات بارغ تو، بارغ ني حرام انتوق  
ني، تنتو بارغ تو حرام لاگي انتوق ني.
- 15 کيت کنا فيکير بالس ني: کالو کيت ماکن اف ۲، فس بارغ هق  
کيت ماکن تو بري هاتي اديق کيت سوسه، بالس ني سروف  
کيت تاءکاسيه کا ري. جاغن بوات خيانه کا ني، دغن  
سابيت هق کيت ماکن ساءني! ايغته، عيسى المسيح، ني  
جوغ ريلا ماتي نق بري اورغ تو بوليه سلامت.
- 16 سبب توله، کيت جاغن بري چله کا اورغ، نق کيچيق هينا  
کا فرکارا ۲ موليق هق کيت فگه.
- 17 کران بيلا توهن دوق مريته دالم هاتي مائسي، ني تاءکات  
مستحق، هق مان بوليه ماکن، هق مان تاءليه ماکن، دق!  
هق مستحق سکالي، توهن بري اورغ تو برهوبوغ باءيك دغن  
ني سمولا، تاءساله اف ۲، فس نق بري دي دوق سوک ريا، کران  
روح توهن دوق اد دالم ديري دي سعمور.
- 18 اورغ هق دوق بيچارا کا المسيح بالس تو، تنتو توهن برکن  
کا ني، فس مائسي فون نق مفاکو کات بي باءيك جوگ.
- 19 سبب توله، کيت کنا کاچغ بوات سموا فرکارا هق بوليه تولوغ  
بري اديق براديق دوق باءيك سام سنديري، فس هق بوليه بري  
ني کهور قواة فرچاي سعمور.
- 20 کيت تاءسير بري جاي فونه کرج توهن دالم هاتي اديق براديق  
کيت، دغن کران مکانن ساءني. سوغکوه مکانن سموا تاء حرام  
انتوق کيت، تافي کالو اورغ لائين جاتوه دالم دوسا، کران هق  
کيت ماکن، ساله جوگ هق کيت بوات تو.
- 21 کالو نق بوات هق بتول، کيت کنا فنتغ، جاغن ماکن هق  
اديق کيت تاء برکن تو، سروف راکيغ، اتوا اير جابيت،  
فس جاغن بوات اف ۲ فون، کالو هق تو نق بري اديق کيت

22 جاتوه دالم دوسا . هق کیت فکغ چارا حال بارغ۲ هق کیت بولیه ماکن ني، فکغله ، تافي فکغ دافن توهن ساج ، جاغن بري کيکير کا اورغ لاءين ! سنغ هاتيله اورغ هق تاهو ده کات، فرکارا مان ۲ هق ري دوق بوات تو ، بتول ، تاء کنا امبيق ساله کا ديري ري .

23 تافي اورغ هق واويه ماکن اتوا تاء ليه ماکن ، تافي ماکن جوگ توهن نق حکوم ساله کا اورغ تو ، کران ري ماکن هق هاتي ري تاء فرچاي کات بتول . اف ۲ هق کیت بوات هق واويه کات بتول کا بق ، هق تو جايي دوسا انتوق کیت .

### ايغتله کا ادیق برادیق دولو

### باب 15

- 1 کیت هق قواة فرچاي ، کنا صبر کا اورغ هق فرچاي تاء قواة لاکي . کیت تاء کنا ايغت کا ديري کیت ساج .
- 2 بق ! تيف ۲ اورغ کنا ايغت نق بوات باءيک کا ادیق برادیق ري . فس بري ري کهور قواة فرچاي لاکي .
- 3 کران تيغوقله المسيح ! ري تاء ايغت کا ديري ري سنديري ، بق ! ار ايات دالم کتاب هق رويت حال المسيح ، کات :

يا توهن ، فرکتان اورغ هق سومغه ماکي کفد مو ، کنا کا اکو جوگ .

- 4 فس سموا فرکارا هق توهن بري اورغ توليس دالم کتاب ماس دولو ، ري نق بري جادي فلاجران انتوق کیت جوگ . توجوان ري دغن ايات ۲ دالم کتاب ني ، ري نق تمبه سماغت کا کیت ، فس بري کیت بوليه برديري تکف ، بوليه ننتي نق تريما هرافن کیت هق تنتو .

توهنله هق بري سماغت کا کیت ، هق بري کیت بوليه برديري تکف . فس اکو دوق مينتاء دغن ري ، نق بري فواق مو گنف ۲

- 6 اورغ بوليه روق سنغ مو اكو ، کران مو روق سهاتي سپاوا دغن عيسى المسيح . بالس توله ، فواق مو نق فوجي کا توهن ، بويي سروف دغن ساتو سوارا ، يائيت نق فوجي کا ري هق جاري توهن ، فس جاري ياف هق عيسى المسيح ، ربي کيت .
- 7 سابيت توله ، مو کنا تريما اريق براديق سموا دالم فواق المسيح جاري فواق مو ، سروف عيسى المسيح تريما کيت سموا جاري ميليق ري . بالس توله نق بري نمفق کمليان توهن .

اورغ سموا بڻسا کنا فوجي کا توهن

- 8 فس دغرله هق اكو نق رويت ني ! توجوان المسيح ماري ، ري نق جاري فنولوڻ کا بڻسا يهوري بري سلامت . ري بري پات کات ، توهن تاء موڻکير جنجي ، فس ري بري جاري فرکارا ۲ هق توهن جنجي دولو کا تو نينيق اورغ يهوي .
- 9 فس ار توجوان سا لاڳي . المسيح نق بري بڻسا لائين ۲ سموا بوليه فوجي کا توهن ، سبب توهن کسياڻ بلس کا بڻسا ري جوڳ . ار ايات دالم کتاب هق رويت حال ني ، کات :

سابيت توله اكو نق کي اوچف شکور کا توهن دغن بڻسا لائين ۲ کاتيق . اكو نق پاپي فوجين کا نام توهن دالم فواق ۲ تو .

- 10 فس ايات سا لاڳي ، کات :

هي بڻسا لائين ۲ ، ماريله برسوک ريا سکالي دغن بڻسا مائسي هق توهن فيليه ده دولو !

- 11 فس سا لاڳي :

فوجيله کا توهن ، مو اورغ بڻسا لائين . بري سموا مائسي فوجي کا ري !



12 فس نبي يعشيا فول رويت کات:

سئورغ کتورونن جسي نق ماري فول . رياه هق تيمبول  
 ماري نق امبيق فرينته اتس بغسا لائن ۲ . فس بغسا  
 لائن ۲ تو فون نق هارف کا دي سمات ۲ .

13 توهنله هق بري هرافن ني کا فواق مو کاتيقي . سابيت توله ،  
 اکو دوق مينتاء دغن دي ، نق بري فواق مو سوک ريا ، دغن  
 سنغ هاتي ، کران مو دوق فرچاي کا دي . بالس نيله ، دغن  
 کواس روح توهن ، هرافن مو نق کهور ۲ تگوه سعمور .

فولوس براني فسن کا اورغ روم هق ني تاء کنل

14 سوغکوه فون اکو براس فواس هاتي چارا حال اديق براديق هق  
 نق تريما سورت ني . اکو تاهوره کات ، مو جاني اورغ باءيك .  
 مو ارتي ده سموا فرکارا ، فس مو بوليه نصيحة مو اکو موليق ده .  
 15 تافي اکو براني نق رويت دوا تيگ امفت فرکارا دالم سورت ني  
 هق اکو نق بري اديق براديق ايغت . اکو براني بالس ني ،  
 16 کران دغن رحمة توهن ، اکو جادي فسوروه عيسى المسيح . دي  
 سوروه اکو کي رويت خبر باءيك حال توهن کا بغسا لائن ۲ .  
 کرج هق اکو بوات ني ، بوليه بنديغ دغن کرج امام ، د بيت  
 المقديس هق باواء قربان نق سمبه کا توهن . توجوان اکو فون  
 نق باواء اورغ بغسا لائن ۲ ماري سروف قربان هق دوق سوچي  
 انتوق توهن ، دغن کواس روح ني ، يائيت قربان هق توهن  
 برکنن نق تريما .

17 سبب توله ، اکو براس بسر هاتي چارا حال کرج هق اکو بوات  
 کا توهن ني ، دغن کواس عيسى المسيح .

18 اکو تاء براني رويت اف ۲ ، ملينکن فرکارا ۲ هق عيسى المسيح  
 بري جاني دغن فاکي اکو ني ، انتوق نق بري اورغ بغسا لائن ۲

فرچاي کا ري دغن طاعة. بي فاکي اكو ني نق رويت فرکتان  
هق بي بري، نق بوات فرکارا ۲ فليق هق جادي تندا بسر،  
فس هق بري نمفق کواس روح دي.

19 اكو برجالن امبيق دكوت جروسليم، هيغڱ سمفي رنگري  
عيليريكوم، فس اكو دوق رويت سعمور، خبر بآيك چارا حال  
عيسى المسيح، بلغ ۲ دوق كي، هيغڱ سمفي چوكوف ستغكوف.

20 چيتا ۲ اكو نق كي رويت خبر بآيك ني، دسموا تمفت اورغ هق  
تاء بياس دغر حال المسيح لاكي. سبب اكو تاء سير كي رويت  
کا تمفت اورغ بياس دغر ده، سروف اورغ هق كي بوات رومه  
اتس فلافيق هق اورغ لتق ده.

21 دق! اكو نق بري جادي سروف ايات دالم كتاب کات:

دتمفت اورغ تاء بياس رويت حال بي، اورغ نق  
تاهو: دتمفت اورغ تاء بياس دغر فون، اورغ نق ارتي.

فولوس دوق چيتا ۲ نق كي سمفي کا کوت روم

22 سابيت نيله، اكو نق كي زياره فواق مو بايق کالي ده،

23 تافي ار چمفيغ سعمور. تافي لاني، کرج اكو هق دوق كي کا

دسموا تمفت تو، هابيس ده. فس سابيت اكو دوق نق كي

زياره کا تمفت فواق مو بايق تاهون ده، اكو ار هرافن نق  
بوليه كي جوگ.

24 بلغ ۲ كي کا رنگري اسفاپول، اكو نق برادو دغن فواق مو، دوا

تيگ هاري. لفس تو، بيلا اكو براس فواس هاتي ده تيغوق

موک مو، اكو نق كي فول کا رنگري تو، دغن فرتولوغن فواق مو.

25 تافي لاني اكو برحاجت نق كي کا کوت جروسليم دولو، نق

تولوغ منولوغ اورغ هق جادي ميليق توهن دسيتو.

26 کران فواق ۲ المسيح رنگري ماكدونيا تو، دغن رنگري احيا،

نق کیریم رویت انتوق نق تولوغ اورغ مسکین ، دالم فواق هق جاي ميليق توهن دکوت جروسليم .

27 دوا۰ فواق تو سنديري ستوجو نق تولوغ بالس تو ، بوکن اکو

فقسا ري ، رق ! سسوڭگوهن ، سروف ري براوتغ دغن ادیق برادیق اورغ يهودي هق جاي فواق المسيح کاتيقي . سبب

اورغ بفسا لائين ۲ بوليه سکیان دالم رحمة توهن دغن کران اورغ يهودي تو . فس موليقله دي تولوغ بري کا اورغ يهودي ، ادیق برادیق ري ، سکیان حاصلن هق توهن بري کا ري ، بوکن ؟

28 بيلا اکو بوات کرج تو سوده ده ، يائيت بري رویت تو سموا

کا ري ده ، اکو نق کي هالا کا نگري سفاپول فول ، فس نق

29 برادو تغه جالن دتمفت فواق مو . فس بيلا اکو کي سمفي کا

تمفت فواق مو ، اکو تاهو ده کات ، عيسى المسيح نق بري

کيت سموا براونتوغ چوکوف سمفرن .

### فولوس سوروه اورغ روم مينتاء دعا انتوق ري کاتيقي

30 فس اکو براس نق سوروه ادیق برادیق سموا ، فاکت مينتاء

دعا دغن سوڭگوه ۲ هاتي سکالي دغن اکو ، انتوق کرج اکو ني ،

دغن سبب هرافن کيت سموا ني کا عيسى المسيح ربّي کيت ،

فس ، دغن سبب کاسيه مواکو هق روح توهن بوبوه دالم

هاتي کيت سموا .

31 مينتاء توهن بري اکو سلامت درفد اورغ يهودي هق تاء فرچاي

کا عيسى ، دنگري يهوديه تو . فس مينتاء توهن بري اورغ هق

جاي ميليق ري ، دکوت جروسليم تو ، تريما دغن سوک هاتي ،

اف ۲ هق اکو بوليه تولوغ ري .

32 لفس تو فول ، کالو توهن بنر بري ، اکو نق ماري کا تمفت مو ،

دغن سوک ۲ هاتي ، نق امبيق ريغ سبنتر دغن فواق مو .

33 اکو بر دعا دغن توهن هق بوليه بري هاتي کيت سنغ ، مينتاء

بري دي روق سکالي دغن فواق مو سموا، امين!

فولوس کيريم کاسيه کا بايق اورغ دکوت روم

باب 16

- 1 فس اکو نق بري فواق مو کنل دغن ادیق برادیق کو، نام فيبيه. دي سئورغ بتينا هق راجين بوات کرج انتوق عیسی المسيح، دبندر کینکریا.
- 2 تولوغ سمبوت دي کاتیق، سبب دي اورغ هق کاسيه کا عیسی المسيح سروف دغن فواق مو جوگ. فس سمبوت دي بالسرمان فاتوت دغن اورغ هق جادي میلیق توهن. کالو ري فايه، اتوا کورغ اف ۲ فون، مینتاء مو تولوغ دي کاتیق، کران دي بیاس بوات بایک کا بايق اورغ، فس کا اکو جوگ.
- 3 اکو نق کیریم کاسيه کا فریسکیلا دغن لاکي ري اکویلا. روا اورغ ني بوات کرج سروف دغن اکو، انتوق عیسی المسيح.
- 4 دي جوغ ماتي کران نق تولوغ بري اکو سلامت جالن مربهیا. اکو تاءلوف کا بويي دي هق بوات کا اکو. فس بوکن اکو سئورغ ساج دق! اورغ بغسا لاین ۲ فون هق جاني فواق ۲ المسيح دسموا تمفت، براس سروف اکو جوگ.
- 5 اکو نق کیریم کاسيه کا فواق المسيح هق کي فراچوم درومه اکویلا کاتیق. فس سلامتله کا ساین کو، ایفینیتوس، هق اکو کاسيه. دیاله اورغ هق فرچاي مولا ۲ سکالي کا عیسی المسيح دنکري اسيا.
- 6 فس سلامتله کا مریم، هق راجين کرج تولوغ فواق مو. فس، سلامتله کا اندرونيکوس دغن جونياس، ادیق برادیق بغسا یهويي کو، هق بیاس ماسوق کوق سروف اکو جوگ. فواق صحابة هق رافت دغن عیسی، کنل مولیق سموا دغن دي.
- 7 فس روا اورغ تو جادي کریستين دولو فد اکو لاکي.
- 8 فس سلامتله کا امغلیاتوس، ساین رافت دغن اکو، کران کیت

كدوا كاسيه عيسي المسيح .

- 9 سلامتله كا اوريانوس ، هق بياس كرج كا المسيح دغن اكو جوڳ .  
فس كا ستاخييس ، هق اكو كاسيه سوڱوڳه .
- 10 فس لاڳي ، سلامتله كا افليس . بي بري نمفق ده كات ري كاسيه  
ستيا كا المسيح . فس سلامتله كا سموا اورغ درومه اريستوبولس .
- 11 سلامتله كا هيروديون ، اديق براديق بڱسا يهويي كو ، فس اديق  
براديق كريستين دالم فواق درومه نرسييسوس .
- 12 فس ، سلامتله كا دوا براديق تو ، نام تروفينه دغن تروفوسه .  
بي فون بوات كرج انتوق المسيح جوڳ . فس ، كا ميقي فرسيس ،  
هق سموا اورغ كاسيه سوڱوڳه . بي بوات كرج بايق انتوق  
توهن .
- 13 فس لاڳي ، سلامتله كا روفوس ، بي هق جايي نمبور ساتو دالم  
كرج ربي عيسي . فس كا مق روفوس كاتيق . بي جايي سروف  
مق اكو سنديري .
- 14 سلامتله كا اسينكريتوس ، فليگون ، هرميس ، فاتروبس ، هرمس ،  
فس كا سموا اديق براديق دالم فواق بي .
- 15 سلامتله كا فيلولوگوس دغن بيني بي جوليا . فس كغد نيوريوس  
دغن اديق بتينا ري كاتيق . فس كغد اوليمفوس ، دغن سموا  
اورغ هق جاري ميليق ربي عيسي دالم فواق بي .
- 16 بري اديق براديق سموا تنجوق كاسيه مو اكو ، دغن كوچوف ،  
بوات سروف اديق براديق كيت سنديري . فواق المسيح  
دسموا تمفت باليق ني ، كيريم كاسيه كا فواق مو دكوت روم !

### فسنن فولوس هق سود سڪالي

- 17 لاني اكو نق فسن سيڪيت كا اديق براديق كو . جاڳاله  
باءيك ۲ ! ار اورغ هق سوڪ بري فواق كريستين جاري باله مو  
اكو سام سنديري ، نق بري مو تيڱل جالن هق بتول . اورغ

تو سوک مٺاجر لائن فد هق ادیق برادیق تریم ده دولو .

18 مو جاغن برسائین دغن اورغ لاگو تو. فواق تو بوکن اورغ هق

بوات کرج انتوق المسیح ، ربی کیت ، دق ! دي بوات کرج نق

بري فواس هاتي دي سنديري . دي چریدیق ، فاکي کیچیفن

19 مانیس ۲ انتوق نق تیغو اورغ هاتي بائیک . سمو اورغ تاهوره

کات فواق مو طاعة سوغکوه ۲ . بیلا اکو دغر خبران ني ، اکو

براس سوک هاتي ، تافي کهندق هاتیکو ، اکو نق بري ادیق

برادیق جاري سروف اورغ هق تاءندي بوات هق جاهت ، فندي

بوات هق بائیل ساج .

20 فس تاء لام لاگی ، توهن هق ار کواس بري کیت سمو سلامت ، دي

نق بري هییلیس هاله کا فواق مو ، سروف دي دوق باوه کاکیمو .

اکو مینتاء توهن بري رحمة هق دوق ار درفد عیسی المسیح ،

ربی کیت ، توروون دوق اتس فواق مو سمو ، امین .

### سائین ۲ فولوس کیریم سلام کا اورغ روم

21 تیموتیوس هق دوق کرج سکالي دغن اکو دسینی ، دي کیریم سلام

کا فواق مو گاتیق . فس لوسیوس ، جاسون دغن سوسفاتیر ، هق

جاري ادیق برادیق یهودي کو ، سموان کیریم سلام جوگ .

22 اکو ترتیوس ، هق توکغ منولیس سورت ني فون ، کیریم سلام

دغن نام ربی عیسی .

23 فس گایوس ، توان رومه تمفت فواق المسیح ماري فراچوم بالیق

24 ني ، دي فون کیریم سلام جوگ . راستوس هق دوق جاگ دویت

تیتسابان دبندر ني ، دغن کوارتس ، ادیق کیت سئورغ لاگی ، دي

کدوا فون کیریم سلام جوگ .

### فولوس دوق فوجي کملیاءن هق توهن

فوجیلہ کا توهن یغ مهاملیا ، هق ار کواس بولیہ بري مو

برديري تگف سعمور. خبر بائيك هق اكو دوق رويت، جامين  
کات بالس تو، ياءيت خبر بائيك چارا حال عيسى المسيح، رهسيا  
هق توهن تاروه تاءبوك دري اوال لاگي.

26 تافي لاني دي بوك بري بوليه تاهو ده کا مائيسي، کوء جالن  
کتاب نبي ۲ دولو. فس توهن کيت، هق تاءار اوال تاءار اخير،  
دي سوروه کيت کي رويت خبر ني کا سموا بفسا، نق بري اورغ  
فرچاي دغن طاعة کا دي.

27 دياه توهن يغ سا، هق ارتي سموا فرکارا. دغن کران عيسى  
المسيحله، مائيسي کيت بوليه فوجي کا توهن، بوات سلام ۲ له.  
امين.